

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**V L A D A**

Broj: 02/1- 36 - 771-15 | 26  
Tuzla, 24.03.2026. godine

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), Vlada Tuzlanskog kantona na sjednici održanoj dana 24.03.2026. godine, d o n o s i

**ZAKLJUČAK**

**I**


Prihvata se Informacija o stanju u oblasti sporta na području Tuzlanskog kantona u 2025. godini.

**II**

Informacija iz tačke I ovog Zaključka uputit će se Skupštini Tuzlanskog kantona na razmatranje.

**DOSTAVITI:**

- 1 x Skupštini Tuzlanskog kantona
- 1 x Ministarstvu za kulturu, sport i mlade
- 1 x Evidenciji
- 1 x a/a




**PREMIJER KANTONA**

**Irfan Halilagić**



Bosna i Hercegovina  
Federacija Bosne i Hercegovine  
Tuzlanski kanton  
Ministarstvo za kulturu, sport i mlade

**INFORMACIJA**  
**o stanju u oblasti sporta na području Tuzlanskog kantona u 2025.**  
**godini**



**MINISTARSTVO ZA KULTURU,**  
**SPORT I MLADE**  
**TUZLANSKOG KANTONA**

mart 2026. godine

<b>UVOD</b>	<b>3</b>
<b>1 STANJE U OBLASTI SPORTA</b>	<b>5</b>
1.1 <i>Stanje institucionalnog i normativnog okvira u Bosni i Hercegovini i Federaciji BiH</i>	5
1.2 <i>Stanje institucionalnog okvira na području Tuzlanskog kantona</i>	6
<b>2 REGISTRI I EVIDENCIONI SISTEM U SPORTU</b>	<b>7</b>
2.1 <i>Registar pravnih osoba u oblasti sporta na području Tuzlanskog kantona</i>	7
2.2 <i>Registar fizičkih osoba u oblasti sporta</i>	8
<b>3 STANJE INSTITUCIONALNOG OKVIRA NA PODRUČJU LOKALNIH ZAJEDNICA TUZLANSKOG KANTONA</b>	<b>10</b>
3.1 <i>Aktivnosti doprinosa sportskih organizacija lokalnom razvoju sporta</i>	14
<b>4 DJELATNOST SPORTSKIH SAVEZA TUZLANSKOG KANTONA</b>	<b>17</b>
4.1 <i>Sportski savez Tuzlanskog kantona</i>	17
4.2 <i>Sportski savez osoba sa invaliditetom Tuzlanskog kantona</i>	19
4.3 <i>Školski sportski savez Tuzlanskog kantona</i>	21
<b>5 SPORTSKA INFRASTRUKTURA</b>	<b>23</b>
5.1 <i>Pregled postojećih sportskih objekata (u vlasništvu JLS i drugih subjekata)</i>	23
5.2 <i>Stanje i opremljenost objekata</i>	25
5.3 <i>Regionalne razlike i dostupnost infrastrukture</i>	25
<b>6 STRUČNA LICA U OBLASTI SPORTA NA PODRUČJU TUZLANSKOG KANTONA</b>	<b>26</b>
6.1 <i>Potreba za kontinuiranom edukacijom stručnih lica u oblasti sporta i sportskih radnika</i>	27
<b>7 SPORT DJECE I MLADIH NA PODRUČJU TUZLANSKOG KANTONA</b>	<b>29</b>
7.1 <i>Masovnost i dostupnost sportskih aktivnosti djeci i mladima</i>	29
7.2 <i>Primjeri dobre prakse na području TK u radu sa omladinskim uzrasnim kategorijama</i>	29
7.3 <i>Značaj sporta u prevenciji rizičnih ponašanja- TK FIT</i>	31
<b>8 Zdravstveni i sigurnosni aspekti sporta</b>	<b>33</b>
8.1 <i>Zdravstvena zaštita sportista</i>	33
8.2 <i>Uloga pružanja i poznavanja prve pomoć i preventivnih mjera</i>	34
8.3 <i>Antidoping kontrole</i>	35
<b>9 Postignuća i pozitivni primjeri</b>	<b>35</b>
9.1 <i>Najznačajniji sportski rezultati klubova i pojedinaca</i>	35
9.2 <i>Sportisti kao najbolji ambasadori Bosne i Hercegovine i Tuzlanskog kantona</i>	37
<b>10 Institucionalna finansijska podrška razvoju sporta u 2025.godini</b>	<b>38</b>
10.1 <i>Finansijska podrška Ministarstva</i>	38
10.2 <i>Finansijska podrška Ministarstva civilnih poslova BiH</i>	43
10.3 <i>Finansijska podrška Federalnog ministarstva kulture i sporta</i>	44
10.4 <i>Finansijska podrška iz Budžeta TK</i>	45
<b>11 SMJERNICE RAZVOJA SPORTA NA PODRUČJU TUZLANSKOG KANTONA U 2026. GODINI</b>	<b>46</b>

## **UVOD**

U skladu sa Programom rada Vlada Tuzlanskog kantona i Skupština Tuzlanskog kantona za 2026. godinu, Ministarstvo za kulturu, sport i mlade Tuzlanskog kantona (u daljem tekstu Ministarstvo) izradilo je Informaciju o stanju u oblasti sporta na području Tuzlanskog kantona za 2025. godinu, kao analitičko-informativni dokument kojim se na sistematičan način sagledavaju ključni pokazatelji razvoja sporta u Tuzlanskom kantonu.

Svrha izrade Informacije nije samo deskriptivno predstavljanje podataka, nego uspostavljanje kontinuiranog mehanizma praćenja stanja u sportu, procjene efekata javnih politika i definisanja razvojnih prioriteta, kako bi Vlada i Skupština Tuzlanskog kantona raspolagale relevantnim osnovama za donošenje strateških i budžetskih odluka u ovoj oblasti.

Dokument je zasnovan na podacima prikupljenim od Porezne uprave Federacije Bosne i Hercegovine, Kantonalnog poreznog ureda Tuzla, Ministarstva pravosuđa i uprave Tuzlanskog kantona, Ministarstva zdravstva Tuzlanskog kantona, Ministarstva za boračka pitanja Tuzlanskog kantona, Agencije za antidoping kontrolu Bosne i Hercegovine, Fakulteta za tjelesni odgoj i sport Univerziteta u Tuzli, JU Službe za zapošljavanje Tuzlanskog kantona, Sportskog saveza Tuzlanskog kantona, Sportskog saveza osoba sa invaliditetom Tuzlanskog kantona, Školskog sportskog saveza Tuzlanskog kantona, jedinica lokalne samouprave Tuz, kao i na službenim evidencijama Ministarstva.

U okviru Informacije posebno su obrađeni institucionalni i organizacioni okvir sporta, struktura i aktivnosti sportskih organizacija na području Kantona, modeli i obim finansiranja sporta sa različitih nivoa vlasti, stanje i ulaganja u sportsku infrastrukturu, ljudski resursi u sportu i kvalitet stručnog rada, razvoj sporta omladinskih uzrasnih kategorija, zdravstveni aspekt sporta sa posebnim osvrtom na ljekarske preglede i antidoping sistem, pozitivne prakse i primjeri uspješnog djelovanja, kao i uloga i doprinos Sportskog saveza Tuzlanskog kantona i Sportskog saveza osoba sa invaliditetom Tuzlanskog kantona u unapređenju sportskog sistema. Informacija istovremeno daje pregled regulatornog okvira i postojećih mehanizama institucionalne podrške razvoju sporta, analizu budžetskih izdvajanja za sport, uključujući sredstva sa kantonalnog i lokalnog nivoa, te definiše smjernice za 2026. godinu, usklađene sa trogodišnjim i godišnjim programom rada Ministarstva, s ciljem daljeg jačanja organizacione stabilnosti, finansijske održivosti i kvaliteta sporta na području Tuzlanskog kantona. Posebno se naglašava da, pored budžetskih sredstava Ministarstva, i drugi resori Tuzlanskog kantona kroz svoje programe realiziraju aktivnosti koje se direktno ili indirektno odnose na sport i podsticanje sportskih aktivnosti, čime se dodatno doprinosi ukupnom razvoju sportskog sektora.

U 2025. godini oblast sporta na području Tuzlanskog kantona karakterišu značajni pomaci kako u pogledu finansijske podrške, tako i u uspostavljanju sistemskih evidencija i unapređenju institucionalnog pristupa razvoju sporta. Posebno je važno istaći da su u 2025. godini povećana izdvajanja za sport, čime je potvrđena opredijeljenost za snažniju podršku razvoju sportskih aktivnosti, sportskih organizacija i sportskih manifestacija od značaja za Tuzlanski kanton.

Jedan od značajnih iskoraka u ovom periodu ogleda se u činjenici da je Ministarstvo po prvi put iz vlastitih budžetskih sredstava podržalo organizaciju reprezentativnih nastupa Bosne i Hercegovine u Tuzli, uključujući međunarodne utakmice u košarci i rukometu održane u dvorani Mejdan. Ovakav vid podrške predstavlja važan iskorak u odnosu na raniji period, kada su se sredstva za ove namjene uglavnom obezbjeđivala putem tekuće rezerve Vlade, dok je u

2025. godini Ministarstvo direktno preuzelo aktivniju ulogu u finansijskoj podršci sportskim događajima od državnog značaja. Također, u 2025. godini na isti način pružena je podrška organizaciji Svjetskog prvenstva u sportskom ribolovu na jezeru Modrac, što predstavlja jedan od najznačajnijih međunarodnih sportskih događaja održanih na području Tuzlanskog kantona. Organizacija ovog takmičenja imala je i širi društveni i ekonomski značaj, posebno u kontekstu razvoja sportskog turizma, što se ogleda u povećanom broju noćenja u zoni jezera Modrac, gdje su u periodu održavanja prvenstva smještajni kapaciteti bili u potpunosti popunjeni.

Istovremeno, u 2025. godini ostvaren je i do sada najveći obuhvat korisnika sportskih stipendija, kako kada su u pitanju stipendije za sportiste i trenere, tako i školske sportske stipendije. Poseban iskorak predstavlja i činjenica da su po prvi put u sistem stipendiranja uključeni i studenti koji su ostvarili značajne sportske rezultate na studentskim takmičenjima, čime je dodatno proširen sistem podrške razvoju sportskih talenata.

Pored finansijske podrške, 2025. godinu obilježava i značajan napredak u uspostavljanju evidencija i registara u oblasti sporta. Do sada nisu postojali ni približni podaci o broju osoba koje se aktivno bave sportom na području Tuzlanskog kantona, dok se kroz prikupljene podatke sada može dobiti okvirna slika o masovnosti sportskih aktivnosti. Također su po prvi put prikupljeni i okvirni podaci o broju obavljenih sportskih ljekarskih pregleda, uz napomenu da potpuna preciznost ovih podataka nije moguća, između ostalog i zbog mogućih dupliranja pregleda kod sportista. Uspostavljanje registara omogućilo je i prvi sistemski uvid u broj stručnih lica angažovanih u sportskim organizacijama. Analiza prikupljenih podataka ukazuje na činjenicu da je broj registrovanih stručnih lica relativno mali, te da značajan broj sportskih organizacija nema angažovana stručna lica koja su formalno osposobljena za rad u sportu, što predstavlja jedan od važnih izazova za dalji razvoj sportskog sistema.

Također, putem javnog poziva za sufinansiranje programa i projekata sportskih organizacija ostvaren je širok obuhvat korisnika, sa posebnim akcentom na omladinske uzrasne kategorije koje predstavljaju osnovu i dugoročnu bazu razvoja svakog sporta. Tuzlanski kanton tradicionalno predstavlja rasadnik sportskih talenata, zbog čega je poseban fokus stavljen na podršku klubovima koji rade sa djecom i mladima. Istovremeno, pružena je podrška i sportskim kolektivima koji su ostvarili plasman na međunarodnoj sceni, čime se nastoji osigurati adekvatna institucionalna podrška promociji sporta i predstavljanju Tuzlanskog kantona i Bosne i Hercegovine na međunarodnom nivou.

Pored toga, do 2025. godine nije postojala ni sistemska evidencija sportskih objekata na području Tuzlanskog kantona. U toku 2025. godine započeto je prikupljanje podataka o sportskoj infrastrukturi i formirana je početna baza podataka o sportskim objektima. Iako ova evidencija još uvijek nije u potpunosti kompletirana, budući da sve lokalne zajednice nisu dostavile tražene podatke, ona predstavlja važnu osnovu za daljnje planiranje razvoja sportske infrastrukture. Prikupljeni podaci omogućavaju uvid u vlasništvo nad sportskim objektima, pristupačnost osoba sa invaliditetom, način njihovog korištenja, kao i broj sportskih organizacija koji u njima realizuju svoje aktivnosti.

## **I STANJE U OBLASTI SPORTA**

### *1.1 Stanje institucionalnog i normativnog okvira u Bosni i Hercegovini i Federaciji BiH*

Sport predstavlja kompleksnu javnu društvenu djelatnost od posebnog značaja, kojoj se u savremenim i razvijenim državama posvećuje sistemski i dugoročna pažnja. Njegov značaj prevazilazi okvire rekreacije i takmičenja, jer sport direktno utiče na javno zdravlje, socijalnu koheziju, obrazovanje, ekonomiju i međunarodnu afirmaciju države. Pored nesumnjivog doprinosa psihofizičkom zdravlju pojedinca, sport ima i izraženu razvojnu, promotivnu i integrativnu funkciju, te predstavlja važan instrument društvene inkluzije, posebno djece, mladih i osoba sa invaliditetom.

Normativni okvir za oblast sporta u Bosni i Hercegovini utemeljen je na Zakon o sportu Bosne i Hercegovine (Službeni glasnik BiH, br. 27/08, 102/09 i 66/16) (u daljem tekstu: Zakon o sportu BiH), koji je usklađen sa temeljnim međunarodnim dokumentima i standardima, uključujući Evropska povelja o sportu, Evropska konvencija o zaštiti ljudskih prava i osnovnih sloboda, Konvencija UN-a o pravima djeteta, Međunarodna konvencija protiv dopinga u sportu, Evropska konvencija o nasilju i nedoličnom ponašanju gledalaca na sportskim priredbama, kao i načelima sadržanim u Olimpijska povelja i Paraolimpijska povelja. Donošenjem Zakona o sportu BiH prestao je važiti raniji sistem zasnovan na propisima iz oblasti fizičke kulture, čime je uspostavljen jedinstven državni okvir koji definiše javni interes u sportu, prava i obaveze sportista i sportskih stručnjaka, zdravstvenu zaštitu, antidoping sistem, finansiranje, kao i obavezu strateškog planiranja razvoja sporta na svim nivoima vlasti.

Stručne analize i višegodišnja praksa ukazuju da osnovni problem Zakona o sportu BiH ne leži toliko u njegovim normativnim opredjeljenjima, koliko u nedovoljnoj i neujednačenoj implementaciji. Jedna od ključnih zamjerki odnosi se na izostanak pune funkcionalnosti institucija i tijela predviđenih Zakonom o sportu BiH, uključujući savjetodavne i koordinacione mehanizme na državnom nivou, čime je otežano strateško upravljanje sportskim sistemom. U praksi je izražen nedostatak jasnih operativnih mehanizama koordinacije između države, entiteta i kantona, što dovodi do preklapanja nadležnosti, administrativnih zastoja i neujednačenog tumačenja pojedinih zakonskih odredbi. Dodatno, u stručnoj javnosti se ukazuje na nedovoljno precizno definisane odnose između državnih sportskih saveza, entitetskih i kantonalnih saveza, kao i na spor proces uspostavljanja saveza na državnom nivou u pojedinim sportovima. Ovakvo stanje ima direktne posljedice na sportiste, posebno u segmentu reprezentativnih nastupa, ostvarivanja prava na stipendije i drugih oblika institucionalne podrške, budući da bez funkcionalnih i međunarodno priznatih saveza sportisti ne mogu u potpunosti realizirati svoja prava. Time se narušava pravna sigurnost i jednakost sportista, što je suprotno osnovnim principima Zakona o sportu BiH. Iako Zakon o sportu BiH prepoznaje javni interes i obavezu finansijske podrške sportu, ne razrađuje dovoljno detaljno modele raspodjele sredstava, kriterije transparentnosti i mehanizme nadzora nad trošenjem javnih sredstava. U uslovima složene ustavne strukture Bosne i Hercegovine, finansiranje sporta ostaje dominantno oslonjeno na niže nivoe vlasti, dok je uloga državnog nivoa ograničena, što stvara neujednačen razvoj sporta i različite standarde podrške u pojedinim dijelovima zemlje. Također Zakon o sportu BiH sadrži napredne principe zabranu diskriminacije, zaštitu maloljetnih sportista, ravnopravnost spolova, borbu protiv dopinga i nasilja na sportskim priredbama – ali da mehanizmi kontrole i sankcionisanja nisu dovoljno razrađeni niti dosljedno primjenjivani. U tom smislu, problem se ogleda u slaboj institucionalnoj povezanosti sportskog sistema sa inspekcijskim, nadzornim i pravosudnim organima, što umanjuje efikasnost zakonskih rješenja.

Sistem finansiranja sporta u Bosni i Hercegovini zasniva se na tzv. kombinovanom modelu, koji podrazumijeva istovremeno učešće javnih budžetskih sredstava i sredstava iz privatnog sektora (sponzorstva, donacije, medijska prava, igre na sreću i drugi oblici tržišnog finansiranja). Takav model karakterističan je za zemlje tržišne ekonomije i podrazumijeva podjelu odgovornosti između javnog i privatnog sektora. Iako se sport u velikoj mjeri oslanja na amaterski rad i volonterski angažman, njegov ekonomski efekat nije zanemariv kroz poreze, takse, doprinose, promet sportske opreme, organizaciju događaja i prateće usluge, sport generira značajne prihode i ima multiplikativni efekat na lokalnu i širu ekonomiju.

Uzimajući u obzir navedeno, može se zaključiti da Zakon o sportu BiH predstavlja solidnu normativnu osnovu za razvoj sporta, ali da je za njegovu punu funkcionalnost neophodno dodatno usklađivanje entitetskih i kantonalnih propisa, preciziranje nadležnosti, jačanje koordinacionih tijela na državnom nivou, unapređenje mehanizama finansijske transparentnosti i osiguranje dosljedne primjene zakonskih odredbi. Samo kroz kombinaciju normativnog unapređenja i stvarne institucionalne primjene moguće je obezbijediti pravnu sigurnost sportista i sportskih organizacija, te uspostaviti stabilan i održiv sistem sporta u Bosni i Hercegovini.

## *1.2 Stanje institucionalnog okvira na području Tuzlanskog kantona*

Efikasno planiranje i provođenje mjera za unapređenje stanja u oblasti sporta na kantonalnom i lokalnom nivou pretpostavlja jasno definisan institucionalni okvir, u kojem su precizno utvrđeni nosioci nadležnosti, njihov djelokrug rada, kao i mehanizmi međusobne koordinacije i komunikacije. Samo takav sistem omogućava usklađeno djelovanje svih aktera od kantonalnih organa uprave do jedinica lokalne samouprave i sportskih organizacija te osigurava dosljednu provedbu javnih politika u oblasti sporta.

Na području Tuzlanski kanton za oblast sporta resorno je nadležno Ministarstvo za kulturu, sport i mlade Tuzlanskog kantona, osnovano 2018. godine, dok operativne i upravne poslove iz ove oblasti obavlja nadležno odjeljenje unutar Ministarstva. Normativni temelj za uređenje sporta na području Kantona predstavlja Zakon o sportu Tuzlanskog kantona – prečišćeni tekst („Službene novine Tuzlanskog kantona“ broj: 11/21) (u daljem tekstu: Zakon o sportu TK), kojim se uređuju javni interes u sportu, ciljevi i nadležnosti Kantona i gradova/općina, osnovni pojmovi i principi organizovanja sporta, obavljanje sportske djelatnosti, programiranje razvoja sporta, uspostavljanje sistema sportske kulture, prava i obaveze sportista, organizovanje domaćih i međunarodnih takmičenja i sportskih priredbi, izgradnja, održavanje i korištenje sportskih objekata, osnivanje i rad sportskih organizacija i saveza, organizovanje ustanova i preduzeća u oblasti sporta, sportske aktivnosti osoba sa invaliditetom, dodjela nagrada i priznanja, zdravstvena zaštita sportista, prevencija nasilja i nedoličnog ponašanja na sportskim priredbama, borba protiv dopinga, stručni rad, informatika u sportu, finansiranje, nadzor i kaznene odredbe.

Pored kantonalnog propisa, na području Tuzlanskog kantona primjenjuje se i Zakon o sportu BiH, kojim je oblast sporta uređena na državnom nivou, uključujući definisanje javnog interesa, raspodjelu nadležnosti između različitih nivoa vlasti, osnovne principe organizovanja sporta, prava i obaveze sportista, međunarodnu saradnju, naučnoistraživački rad, finansiranje i nadzor. Time je uspostavljen višeslojni normativni okvir koji zahtijeva međusobno usklađivanje i koordinisanu primjenu.

U cilju unapređenja evidencije i transparentnosti u sportskom sektoru, Ministarstvo je u decembru 2021. godine donijelo podzakonske akte kojima je propisan sadržaj i način vođenja registara pravnih i fizičkih osoba u oblasti sporta, a tokom 2024. godine registri su i operativno uspostavljeni. Time su stvoreni uslovi za sistematično praćenje broja i statusa sportskih organizacija, stručnog kadra i drugih subjekata koji djeluju u sportu, što predstavlja značajan iskorak u institucionalnom jačanju sektora.

U okviru programa „Finansiranje i podrška razvoju sporta,“ Ministarstvo je u 2025. godini realizovalo tri javna poziva namijenjena razvoju sporta kao djelatnosti od javnog interesa na području Kantona i to:

1. Javni poziv za sufinansiranje programa/projekata sportskih organizacija u oblasti tjelesne kulture i sporta za 2025. godinu,
2. Javni poziv za dodjelu sportskih stipendija za sportiste i trenere za 2025. godinu,
3. Javni poziv za sufinansiranje projekata rekonstrukcije i opremanja sportskih objekata za 2025. godinu.

Raspodjela budžetskih sredstava po navedenim javnim pozivima vrši se na osnovu posebne Odluke o utvrđivanju uslova, kriterija i postupka raspodjele sredstava, koju Ministarstvo priprema za svaku budžetsku godinu, a koju usvaja Vlada Tuzlanskog kantona. Navedenom odlukom precizno se definišu namjene, prioritetne oblasti, visina planiranih sredstava po pojedinim programima, kao i kriteriji bodovanja i vrednovanja prijava, te ona predstavlja osnovni pravni i finansijski osnov za svaku raspodjelu sredstava iz budžetske pozicije Ministarstva namijenjene sportu. Bez donošenja i usvajanja ove odluke nije moguće izvršiti raspodjelu sredstava. Odluka se svake godine analizira i unapređuje, uz nastojanje da bude preciznija, operativnija i fleksibilnija, kako bi se omogućilo učešće što većeg broja pravnih subjekata u sistemu sporta i osigurala pravičnija i efikasnija podrška razvoju sporta na području Tuzlanskog kantona.

## **2. REGISTRI I EVIDENCIONI SISTEM U SPORTU**

### *2.1 Registar pravnih osoba u oblasti sporta na području Tuzlanskog kantona*

Ministarstvo je u decembru 2021. godine donijelo podzakonske akte kojima je propisan sadržaj i način vođenja registara pravnih i fizičkih osoba u oblasti sporta, čime je normativno uređen jedan od ključnih mehanizama za uspostavljanje sistemskog nadzora i razvoja sportskog sektora. Tokom 2024. godine registri su i operativno uspostavljeni, čime su stvoreni uslovi za kontinuirano i sistematično praćenje broja i statusa sportskih organizacija, stručnog kadra i drugih subjekata koji djeluju u sportu. Ovaj proces predstavlja značajan institucionalni iskorak, jer je po prvi put omogućeno cjelovito i strukturirano sagledavanje stanja u oblasti sporta na području Tuzlanskog kantona.

Registar pravnih osoba u oblasti sporta ima višestruk značaj. On predstavlja temeljnu bazu podataka koja omogućava preciznu i ažuriranu evidenciju svih pravnih lica koja obavljaju sportsku djelatnost, uključujući sportske klubove, saveze, udruženja i druge subjekte. Na taj način Ministarstvo raspolaže pouzdanim informacijama o organizacionoj strukturi sportskog sistema, zastupljenosti pojedinih sportskih grana, stepenu organizovanosti i teritorijalnoj rasprostranjenosti sportskih aktivnosti. Takva evidencija omogućava efikasnije praćenje rada sportskih organizacija, bolju koordinaciju između nadležnih institucija i sportskih subjekata, kao i pravovremeno uočavanje izazova koji zahtijevaju institucionalnu intervenciju.

Uspostavljeni registar ima i izraženu razvojnu dimenziju, jer omogućava preciznije planiranje i usmjeravanje budžetskih sredstava i drugih oblika podrške, uključujući infrastrukturne projekte, edukacije i stručno usavršavanje kadra. Na osnovu podataka iz registra moguće je sagledati realne kapacitete sportskih organizacija, broj selekcija i uzrasnih kategorija, nivo takmičenja, kao i obim aktivnosti koje provode. Time se stvaraju pretpostavke za donošenje informisanih odluka i kreiranje politika zasnovanih na stvarnim pokazateljima, a ne na parcijalnim ili procijenjenim podacima.

Zaključno sa 12.12.2025. godine, u Registar pravnih lica u oblasti sporta na području Tuzlanskog kantona **upisan je ukupno 51 sportski subjekt**. Struktura registrovanih organizacija pokazuje dominantnu zastupljenost **fudbalskih klubova (14)**, zatim **sportskih saveza, granskih i kantonalnih (12)**, **odbojkaških klubova (5)**, **karate klubova (3)**, **udruženja za sportsku rekreaciju (3)**, te po dva šahovska, gimnastička i futsal kluba. Registrovan je i po jedan atletski, plivački i boksački klub, jedno udruženje za sportsku ribolovnu djelatnost, jedno planinarsko društvo, kao i tri ostala udruženja koja se po svojoj djelatnosti bave sportom. Ovakva struktura ukazuje na raznovrsnost sportskih aktivnosti, ali i na neravnomjernu zastupljenost pojedinih sportskih grana, što može predstavljati osnov za daljnje razvojne intervencije. U 2024. godini u registar je bilo upisano ukupno 70 sportskih kolektiva. Registar predstavlja i ključni instrument finansijskog planiranja u oblasti sporta. Na osnovu raspoloživih podataka moguće je okvirno sagledati koliko subjekata djeluje u segmentima vrhunskog sporta, kvalitetnog sporta i sportske rekreacije, kao i procijeniti potrebe vezane za sufinansiranje omladinskih uzrasnih kategorija i rad sportskih saveza. Ovakav pristup omogućava racionalnije i transparentnije planiranje budžetskih sredstava, u skladu sa stvarnim potrebama i kapacitetima sportskog sektora.

U skladu s podacima iz **Registra udruženja Ministarstva pravosuđa i uprave Tuzlanskog kantona, tokom 2025. godine izvršen je upis 21 udruženja kojima je područje djelovanja sport i rekreacija, dok je jedno udruženje brisano iz registra**. Ovi podaci ukazuju na kontinuiran interes za osnivanje sportskih i sportsko-rekreativnih udruženja na području Tuzlanskog kantona. Međutim, važeći propisi jasno definišu obavezu pravnih osoba u oblasti sporta da, u roku od 15 dana od dana dobijanja rješenja o upisu u sudski registar, odnosno registar Ministarstva pravosuđa i uprave Tuzlanskog kantona, podnesu zahtjev za upis u Registar pravnih osoba u oblasti sporta koji vodi Ministarstvo za kulturu, sport i mlade Tuzlanskog kantona. Analizom spiska udruženja koja su u 2025. godini upisana u registar Ministarstva pravosuđa i uprave Tuzlanskog kantona, utvrđeno je da je samo jedno udruženje istovremeno izvršilo upis i u Registar pravnih osoba u oblasti sporta Ministarstva za kulturu, sport i mlade Tuzlanskog kantona. Ovakav podatak ukazuje na izrazito nizak stepen poštivanja zakonske obaveze kada je riječ o registraciji sportskih pravnih osoba u nadležnom resornom ministarstvu. Navedeno stanje ima direktne posljedice na mogućnost sveobuhvatnog praćenja stanja u oblasti sporta, planiranja mjera podrške, kao i transparentne raspodjele budžetskih sredstava, s obzirom na to da se u Registru Ministarstva za kulturu, sport i mlade Tuzlanskog kantona ne nalazi realan broj aktivnih pravnih osoba koje djeluju u oblasti sporta. Ovi podaci ukazuju na potrebu za dodatnim informisanjem i jačanjem nadzora nad primjenom propisa, kako bi se osiguralo potpuno i tačno evidentiranje sportskih organizacija na području kantona.

## *2.2 Registar fizičkih osoba u oblasti sporta*

Na području Tuzlanskog kantona u **Registar fizičkih osoba u oblasti sporta upisano je ukupno 12 fizičkih lica**. Od tog broja, **devet su stručna lica osposobljena za rad u sportu, dok su tri lica evidentirana kao sportski radnici**.

**Struktura upisanih stručnih lica obuhvata jednog trenera karatea, četiri trenera košarke, jednog trenera fudbala i tri trenera gimnastike.** Kada su u pitanju sportski radnici, u registar su upisane tri sudije, od čega dvije iz oblasti košarke i jedna iz oblasti fudbala. Uprkos postojanju značajnog broja sportskih subjekata upisanih u Registar sportskih organizacija, odziv fizičkih lica za upis i dalje je nedovoljan. U 2024. godini u registar je bilo upisano 12 fizičkih lica, što pokazuje da u 2025. godini nije ostvaren suštinski napredak u pogledu povećanja obuhvata registracije. Ovakav nivo evidentiranih stručnih lica i sportskih radnika ne odražava stvarne potrebe sportskog sistema, imajući u vidu broj aktivnih klubova, selekcija i takmičarskih aktivnosti na području Kantona.

Zakonsku obavezu upisa u registar imaju stručna lica osposobljena za rad u sportu i sportski radnici, jer je registracija preduslov za zakonito obavljanje stručnih poslova u oblasti sporta. U skladu sa Zakonom o sportu TK, stručne poslove u sportu mogu obavljati isključivo lica koja posjeduju odgovarajuće stručne kvalifikacije i ispunjavaju propisane uslove. Stoga slab odziv za upis u registar ukazuje na potrebu intenzivnijeg informisanja sportskih subjekata, dosljednije primjene zakonskih odredbi i jačanja nadzora, kako bi se osigurala zakonitost rada i podigao profesionalni standard u oblasti sporta na području Tuzlanskog kantona.

Prema podacima Kantonalnog poreznog ureda Tuzla, koji djeluje u okviru **Porezne uprave Federacije Bosne i Hercegovine, na području Tuzlanskog kantona u 2025. godini evidentirana su ukupno 44 zaposlena lica u pravnim osobama koje obavljaju djelatnosti iz oblasti sporta, a koje obuhvataju sportske klubove, sportske objekte i druge srodne sportske djelatnosti.** Podaci jasno ukazuju da je broj formalno zaposlenih lica u organizovanom sportu znatno manji u odnosu na ukupan broj registrovanih pravnih lica koja se u širem smislu vode kao sportske djelatnosti, što dodatno potvrđuje da se značajan dio sportskih aktivnosti realizuje bez zasnivanja radnog odnosa ili kroz druge oblike angažmana. Navedeni podaci predstavljaju važan osnov za sagledavanje realnog kapaciteta sportskog sektora za zapošljavanje, kao i za planiranje budućih mjera podrške razvoju sporta na području Tuzlanskog kantona. **Istovremeno, prema evidencijama Porezne uprave, na području Tuzlanskog kantona registrovana su ukupno 744 pravna lica čija je osnovna ili pretežna djelatnost svrstana u oblast sporta i srodnih djelatnosti.** U navedeni broj uključeni su i fitness centri (46 pravnih lica), kao i pravna lica registrovana za djelatnosti zabavnih i tematskih parkova (8 pravnih lica).

Pismeno smo se obratili Kantonalnoj upravi za inspeksijske poslove Tuzlanskog kantona i zatražili podatke o inspeksijskim nadzorima nad pravnim osobama u oblasti sporta, uključujući eventualne mjere zabrane obavljanja djelatnosti i angažman stručnih lica, ali odgovor nam nije dostavljen. Ova situacija dodatno ističe izazove u praćenju rada sportskih organizacija na terenu i naglašava značaj kontinuirane podrške Ministarstva i Vlade Tuzlanskog kantona u osiguravanju sigurnog i kvalitetnog okruženja za sport.

### **3 STANJE INSTITUCIONALNOG OKVIRA NA PODRUČJU LOKALNIH ZAJEDNICA TUZLANSKOG KANTONA**

Stanje institucionalnog okvira za sport na području lokalnih zajednica Tuzlanskog kantona pokazuje mješovitu sliku između razvijenih i slabije organiziranih struktura. Veći gradovi i općine, poput Tuzle, Lukavca, Srebrenika i Gradačca, imaju relativno razvijene institucionalne okvire, što podrazumijeva postojanje općinskih ili gradskih službi zaduženih za sport, budžetskih sredstava predviđenih za podršku sportskim organizacijama, te aktivnih sportskih saveza i klubova koji koordiniraju trenažne procese i takmičenja. S druge strane, manje općine, poput Teočaka i Sapne, imaju ograničen institucionalni kapacitet. U tim sredinama postoji mali broj sportskih klubova, a sportski savezi su često formalno registrovani, ali praktično neaktivni zbog nedostatka sportista i infrastrukturnih kapaciteta. Posljedica toga je da lokalni sportski subjekti imaju ograničenu podršku, djeca i mladi moraju putovati u susjedne općine da bi trenirali, a budžetska sredstva koja se dodjeljuju često nisu dovoljna da omoguće održiv rad klubova. Sve u svemu, institucionalni okvir na nivou lokalnih zajednica je neravnomjerno razvijen: dok veće i srednje općine imaju kapacitete za planiranje i realizaciju sportskih aktivnosti, u manjim i ruralnim sredinama institucionalna podrška sportu je ograničena, što negativno utiče na dostupnost sporta mladima i na ukupnu aktivnost sportskih saveza. Aktivnije i funkcionalnije lokalne strukture mogle bi poboljšati raspodjelu sredstava, povećati uključenost djece i mladih u sport i doprinijeti održivom razvoju sportskog sektora na cijelom području kantona. Poboljšanje institucionalnog okvira sporta na nivou lokalnih zajednica može se ostvariti kroz nekoliko ključnih mjera. Prvo, potrebno je ojačati kapacitete općinskih i gradskih službi zaduženih za sport, kako bi se osiguralo planiranje, praćenje i koordinacija sportskih aktivnosti, te efikasnije korištenje budžetskih sredstava. Drugo, važno je aktivirati i osnažiti lokalne sportske saveze, naročito u manjim općinama gdje su savezi formalno registrovani, ali neaktivni, jer bi aktivni savezi mogli vršiti funkciju koordinacije, edukacije i podrške klubovima, čime bi se povećala vidljivost i opravdanost finansiranja sportskih programa. Ministarstvo za kulturu, sport i mlade Tuzlanskog kantona kontinuirano provodi edukacije i informativne aktivnosti u vezi sa svim javnim pozivima. Uz svaki javni poziv, predstavnici sportskih saveza i klubova sa svih dijelova kantona pozivaju se da prisustvuju Info



danu, gdje dobijaju detaljne informacije o uslovima, kriterijima i procedurama apliciranja. Ove edukacije omogućavaju sportskim subjektima da pravilno pripreme svoje projekte, izrade kvalitetne prijave i na taj način povećaju šanse za osiguranje sredstava za trenažni proces, takmičenja, omladinske programe, sportske manifestacije i druge

aktivnosti od značaja za razvoj sporta u kantonu. Kroz ovakav pristup Ministarstvo osigurava transparentnost, jednak pristup informacijama i podstiče profesionalizaciju upravljanja sportskim projektima na nivou cijelog Tuzlanskog kantona.

U svrhu uvida u budžetska izdvajanja za sport na svim nivoima vlasti, intencija Ministarstva bila je da se sagledaju izdvajanja za sport iz budžeta lokalnih zajednica na području Tuzlanskog kantona u 2025. godini. U cilju prikupljanja podataka iz budžeta lokalnih

zajednica Ministarstvo je podatke tražilo od nadležnih službi lokalnih zajednica. Ove informacije će biti neophodne za kreiranje budućih strategija koje će osigurati održiv i kontinuiran rast sportskog sektora, te za implementaciju mjera koje će poboljšati uslove za rad sportskih organizacija i razvoj sporta u cijelom kantonu.

	2021.	2022.	2023.	2024.	2025.
	345.646,00	708.940,00	680.140,00	690.940,00	537.790,00
	35.000,00	33.700,00	40.000,00	40.000,00	25.000,00
	66.000,00	95.600,00	116.600,00	134.950,00	167.820,00
	643.934,00	1.963.023,00	1.963.430,00	-	-
	595.000,00	665,00	674.400,00	814.600,00	870.000,00
	308.132,00	341.082,00	323.251,30	326.051,79	250.225,00
	679.508,00	907.399,00	1.052.964,70	1.026.007,47	700.000,00
	3.000,00	12.800,00	63.656,40	-	-
	14.500,00	21.000,00	26.000,00	27.621,32	122.000,00
	392.900,00	520.900,00	590.800,00	912.800,00	540.000,00
	3.048.000,00	3.987.972,00	2.400.000,00	3.708.800,00	282.100,00
	284.150,00	451.927,00	90.940,60	-	80.000,00
	670.000,00	600.000,00	610.000,00	-	-

*Tabela 1. Pregled izdvojenih sredstava za oblast sporta na području Tuzlanskog kantona u 2025. godini po lokalnim zajednicama<sup>1</sup>*

*Napomena: Iznosi su prikazani u KM; tamo gdje podaci nisu dostavljeni označeno je „-“.*

Analizom izdvajanja za sport u jedinicama lokalne samouprave Tuzlanskog kantona u periodu 2021–2025. godine uočavaju se značajne razlike u dinamici rasta, kontinuitetu finansiranja i stepenu prioritizacije sporta među gradovima i općinama. U 2025. godini izdvajanja za sport u jedinicama lokalne samouprave na području Tuzlanskog kantona pokazuju različite trendove u odnosu na prethodne godine, uz izražene razlike između pojedinih gradova i općina. Analiza dostavljenih podataka ukazuje da je kod dijela lokalnih zajednica evidentan nastavak rasta ulaganja u sport, dok je kod drugih prisutna stagnacija ili smanjenje u odnosu na ranije periode, a u određenom broju slučajeva izostali su i podaci za 2025. godinu. U 2025. godini najveći pojedinačni iznos izdvajanja za sport i dalje bilježi Grad Tuzla, koji je za ovu oblast izdvojio 3.287.180,60 KM. Iako se radi o značajnom iznosu, on je niži u odnosu na rekordnu 2022. i 2024. godinu, što ukazuje na blago smanjenje ulaganja, ali uz zadržavanje dominantne uloge Tuzle u finansiranju sporta na lokalnom nivou. Sličan trend vidljiv je i kod Grada Lukavca, gdje su izdvajanja u 2025. godini iznosila 840.000,00 KM, što predstavlja pad u odnosu na 2023. i 2024. godinu, ali i dalje ukazuje na stabilan nivo podrške sportu u odnosu na ranije godine. Pozitivan primjer u 2025. godini predstavlja Grad Gradačac, koji je povećao izdvajanja, čime je nastavljen kontinuitet rasta iz prethodnih godina. U poređenju s 2021. godinom, izdvajanja su povećana za više od 40%, što jasno ukazuje na jačanje uloge sporta u lokalnim budžetskim prioritetima. Sličan, iako umjereniji rast, bilježi i Općina Kalesija, koja je u 2025. godini izdvojila 346.509,25 KM, što predstavlja blago povećanje u odnosu na prethodne godine i izlazak iz višegodišnje stagnacije. Posebno izražen pomak u 2025. godini vidljiv je kod manjih općina. Općina Doboj Istok nastavila je višegodišnji trend rasta te je u 2025. godini izdvojila 167.820,00 KM, što je više nego dvostruko u odnosu na 2021. godinu. Općina Sapna također bilježi kontinuiran rast, s izdvajanjima od 49.124,02 KM u 2025. godini, što predstavlja značajno povećanje u odnosu na ranije godine, iako se radi o manjim apsolutnim iznosima. Najizraženiji relativni rast zabilježen je kod Općine Teočak, koja je u 2025. godini izdvojila 96.357,19 KM, čime je ostvaren značajan iskorak u odnosu na prethodni period, posebno u

<sup>1</sup> Podaci dostupni iz izvještaja lokalnih zajednica sa područja Tk

poređenju s vrlo niskim izdvajanjima iz ranijih godina. Kod pojedinih lokalnih zajednica u 2025. godini evidentan je pad ili nedostatak kontinuiteta. Općina Banovići je u 2025. godini izdvojila 611.790,00 KM, što predstavlja smanjenje u odnosu na 2022, 2023. i 2024. godinu, iako su izdvajanja i dalje viša nego u 2021. godini. Općina Kladanj bilježi značajno niži nivo izdvajanja u 2025. godini, sa 80.510,00 KM, što je višestruko manje u odnosu na period 2021–2022, te ukazuje na dugotrajniji pad ulaganja u sport. Za Grad Gračanicu i Grad Živinice u 2025. godini nisu dostavljeni podaci o izdvajanjima za sport, što predstavlja otežavajuću okolnost za potpunu procjenu stanja i poređenje s prethodnim godinama, posebno imajući u vidu značaj ovih lokalnih zajednica u ukupnim sportskim aktivnostima.

Prethodno navedene lokalne zajednice na području Tuzlanskog kantona, za koje je urađena analiza, sredstva za sport raspoređuju kroz javne pozive ili direktne transfere, u zavisnosti od namjene i tipa podrške. Kroz javne pozive finansiraju se projekti i programi sportskih organizacija, manifestacije, trenajni procesi omladinskih selekcija i takmičenja, dok se direktni transferi najčešće koriste za podršku kapitalnim ulaganjima u sportsku infrastrukturu, sanaciju i održavanje objekata, kao i za operativne troškove sportskih klubova i saveza.

Sredstva koja izdvajaju lokalne zajednice i dalje ostaju nedovoljna kada uzmemo u obzir stvarne potrebe stanovništva na području Tuzlanskog kantona. Sport je ključan za zdravlje i razvoj zajednice, ali i za promociju regije kroz postizanje vrhunskih sportskih rezultata, što zahtijeva kontinuiranu i značajnu podršku. **Problematična je, međutim, sportska infrastruktura koja je već dugo u lošem stanju, a ulaganja u njezinu modernizaciju i adaptaciju su nedostatna.** Mnoge sportske dvorane, tereni i prateći objekti nisu adekvatno opremljeni niti održavani, što stvara ozbiljne prepreke za sportske aktivnosti i razvoj talentovanih sportista. Ministarstvo za kulturu, sport i mlade Tuzlanskog kantona **petu godinu uzastopno izdvaja značajna finansijska sredstva** kada je u pitanju rekonstrukcija i opremanje sportskih objekata a koji se direktno tiče i lokalnih zajednica na čijem području se objekti i nalaze. Provođenjem Javnog poziva za sufinansiranje projekata rekonstrukcije i opremanja sportskih objekata za 2025. godinu **utvrđeno je da su sportski objekti u Tuzlanskom kantonu najvećim dijelom u lošem stanju** čime je umanjena mogućnost djece i omladine za bavljenje sportom, a samim time je smanjena mogućnost postizanja vrhunskih sportskih rezultata. **Kroz višegodišnji rad na obezbjeđivanju finansijskih sredstava i podrške lokalnim zajednicama, Ministarstvo je omogućilo mnogim manjim opštinama da dovrše projekte koji su započeti prije nekoliko godina, a koji su dugo čekali na završetak zbog nedostatka potrebnih resursa.** Ova ulaganja i podrška Ministarstva, koja su se usmjerila na rekonstrukciju i opremanje postojećih sportskih objekata, omogućila su općinama da završe infrastrukturne projekte koji su bili u fazi zapuštenosti ili nepotpunosti. Nakon dugog perioda čekanja, ovi objekti su napokon stavljeni u pogon i postali su na raspolaganju lokalnim sportistima, sportskim klubovima i zajednicama. Ovaj razvoj je imao veliki uticaj na unapređenje uslova za treniranje, povećanje broja sportskih aktivnosti, ali i na motivaciju mladih sportista koji su dobili priliku da treniraju u boljim uslovima, što je direktno doprinijelo njihovom razvoju i uspjesima. Samim tim, sport u manjim opštinama postaje prepoznatljiviji, čime se stvaraju i nove mogućnosti za priliv novih talenata, ali i za privlačenje sponzora i podrške koji će omogućiti dalji rast i razvoj tih opština u oblasti sporta.

Nadalje, prema izvještajima lokalnih zajednica sa područja Tuzlanskog kantona za potrebe ove Informacije mali broj lokalnih zajednica sa područja Tuzlanskog kantona izdvaja sredstva iz bužeta za stipendiranje perspektivnih sportista, takav pristup negativno utječe na motivaciju mladih sportista, koji se suočavaju s finansijskim izazovima u svom sportskom uspinjanju. Bez adekvatne finansijske podrške, mnogi talentirani sportisti nemaju priliku ostvariti svoj puni potencijal, jer se suočavaju s teškoćama u financiranju opreme, putovanja,

treninga i drugih osnovnih potreba za uspješan razvoj. Zbog svega navedenog, potrebno je povećati ulaganja u sport, ne samo u vidu financijskih sredstava, nego i kroz ozbiljne investicije u infrastrukturu i adekvatne stipendije za talentovane sportiste, kako bi se omogućio njihov kontinuirani napredak i osigurala budućnost sporta na ovom području.

**Analizom stanja na terenu i uvidom u rad sportskih organizacija na području Tuzlanskog kantona vidljivo je da, pored nedovoljno razvijene i zastarjele sportske infrastrukture, jedan od najvećih problema predstavlja nedovoljno sufinansiranje trenažnog procesa klubova.** Posebno opterećenje za sportske kolektive predstavljaju visoki iznosi kotizacija i taksi koje klubovi plaćaju nadležnim granskim savezima radi učešća u ligama i takmičenjima, kao i troškovi službenih lica, putovanja i organizacije domaćih utakmica. Za veći broj klubova, naročito onih koji rade sa omladinskim kategorijama, ovi izdaci predstavljaju značajan financijski teret koji direktno utiče na kontinuitet rada i obim aktivnosti. Trenažni proces, koji podrazumijeva angažman stručnog kadra, zakup i održavanje sportskih objekata, nabavku opreme, troškove prevoza i takmičenja, u najvećem broju slučajeva finansira se kombinacijom budžetskih grantova i participacije roditelja. Takav model finansiranja dugoročno nije održiv, jer teret finansiranja sporta mladih često prelazi na porodice, što može dovesti do smanjenja uključenosti djece u sportske aktivnosti. **Ministarstvo kroz Javni poziv za sufinansiranje programa i projekata sportskih organizacija nastoji da ublaži navedene probleme, posebno kroz podršku omladinskim selekcijama, sufinansiranje takmičarskih aktivnosti i podršku radu sportskih saveza.** Ipak, raspoloživa sredstva nisu dovoljna da u potpunosti pokriju stvarne potrebe klubova, posebno imajući u vidu rast troškova organizacije takmičenja i održavanja redovnog trenažnog procesa.


Poseban izazov predstavljaju manje i demografski osjetljivije općine, poput Teočaka i Sapne, gdje je primjetno da djeluje mali broj sportskih klubova i gdje djeca i mladi nemaju raznovrsne mogućnosti za bavljenje sportom u mjestu prebivališta. U takvim sredinama nerijetko se dešava da djeca putuju u veće općine, poput Kalesije, kako bi pohađala treninge i učestvovala u sportskim aktivnostima. Ovakva situacija dodatno opterećuje porodice financijski i logistički, te ukazuje na potrebu ravnomjernijeg razvoja sportskih kapaciteta na cijelom području Kantona. Sve navedeno potvrđuje da je, pored infrastrukturnih ulaganja, neophodno sistemski pristupiti jačanju financijske stabilnosti sportskih klubova, posebno u segmentu sufinansiranja trenažnog procesa i smanjenja indirektnih troškova učešća u takmičenjima, kako bi sport bio dostupniji većem broju djece i mladih, bez obzira na mjesto stanovanja.

Na području Tuzlanskog kantona u 2025. godini djelovali su brojni aktivni sportski savezi, koji svojim radom doprinose razvoju sporta i omogućavaju mladima da se bave različitim sportovima. Ipak, u isto vrijeme prisutni su i neaktivni ili slabije aktivni savezi, što negativno utiče na cjelokupni razvoj sporta u tim sredinama. Primjer za to je Sportski savez u Teočaku, koji je 2025. godine bio praktično pred gašenjem, što i nije iznenađujuće s obzirom na to da u općini praktično nema klubova i da djeca nemaju lokalne mogućnosti za treniranje. Ovakva situacija pokazuje da bi, da savezi bili aktivniji i uključeni u organizaciju i promociju sporta, sigurno postojala veća podrška kroz budžetska izdvajanja i javne pozive, jer bi se kroz aktivan rad stvorio veći pritisak i opravdanost za raspodjelu sredstava. Aktivni sportski savezi mogli bi djelovati kao pokretači lokalnih sportskih aktivnosti, poboljšati dostupnost sportskih programa i osigurati kontinuitet trenažnog procesa, čime bi direktno doprinijeli razvoju sporta i motivisali lokalne zajednice da veće resurse usmjere ka sportu i mladima.

U 2025. godini Ministarstvo je pružilo značajnu podršku razvoju sportske infrastrukture širom kantona, s posebnim fokusom na projekte u manjim općinama, gdje je dostupnost i kvalitet sportskih objekata često ograničen. Tako su, primjerice, NK „Bratstvo“ Gračanica dobio sredstva za realizaciju projekta sanacije tribina, dok je FK „Bosna“ Kalesija finansiran za projekat sanacije sistema drenaže. Ovi projekti su posebno važni jer doprinose sigurnosti sportista, održivosti terena i mogućnosti nesmetanog odvijanja treninga i takmičenja, što je ključni faktor za razvoj sporta u manjim općinama. Takođe, općina Sapna je u 2025. godini podržala projekat zamjene i ugradnje LED rasvjete u sportskoj dvorani, što značajno unapređuje uslove za trenažni proces i



organizaciju takmičenja, te u velikoj mjeri doprinosi ekonomičnost. Fudbalski klubovi i sportske dvorane u manjim općinama, poput Sapne, Gračanice i Kalesije, imaju centralnu ulogu u lokalnoj sportskoj zajednici: oni ne samo da omogućavaju redovne treninge i takmičenja, već i okupljaju djecu i mlade, promovišu zdrav način života i pružaju osnovu za razvoj budućih sportista. Investicije u ove objekte stoga imaju višestruku korist – poboljšavaju sportske kapacitete, povećavaju sigurnost i dostupnost sporta, te podstiču aktivno uključivanje mladih u lokalne sportske aktivnosti.



### *3.1 Aktivnosti doprinosa sportskih organizacija lokalnom razvoju sporta*

Sportske organizacije na području Tuzlanskog kantona predstavljaju temelj razvoja sporta na lokalnom nivou, jer kroz svoje redovne takmičarske aktivnosti, rad sa mladim selekcijama, organizaciju sportskih manifestacija i saradnju sa jedinicama lokalne samouprave neposredno utiču na dostupnost i kvalitet sportskih sadržaja građanima. Na osnovu podataka kojima raspolažemo iz Izvještaja o radu Sportskog saveza Tuzlanskog kantona za 2025. godinu, a koji su dostavljeni od strane gradskih i općinskih sportskih saveza, može se sagledati stvarni obim aktivnosti i doprinos sportskih organizacija razvoju sporta na lokalnom nivou. Izvještaji

ukazuju na razlike u organizacionim kapacitetima, broju klubova i takmičarskim dometima između pojedinih sredina, ali i na postojanje kontinuiteta rada, posebno u omladinskim kategorijama, što predstavlja ključnu osnovu dugoročnog razvoja sporta na području Tuzlanskog kantona.

**Grad Tuzla** se izdvaja kao sredina sa najvećom koncentracijom sportskih kolektiva i najširim spektrom sportskih disciplina. U izvještajnom periodu evidentirani su zapaženi rezultati u košarci i odbojci, gdje su klubovi zadržali konkurentnost u najvišim rangovima takmičenja u Bosni i Hercegovini, dok je u rukometu registrovan pad rezultatske stabilnosti u odnosu na prethodne godine, posebno kod seniorskih selekcija. Istovremeno, omladinski pogoni bilježe kontinuirane nastupe na federalnim i državnim prvenstvima, čime se potvrđuje da Tuzla i dalje predstavlja najznačajniji sportski centar Tuzlanskog kantona. U **Gradu Živinice** naglašena je aktivnost u borilačkim sportovima i nogometu, pri čemu su sportisti iz karate i taekwondo klubova ostvarili plasmane i medalje na državnim prvenstvima. Nogometni kolektivi zadržali su stabilne pozicije u okviru federalnih takmičenja, a posebno se ističe jedan karate klub koji je kroz kontinuitet medalja u mlađim uzrasnim kategorijama postao prepoznatljiv nosilac sportskih rezultata u ovoj sredini. **Općina Banovići** tradicionalno se oslanja na nogomet kao dominantnu sportsku granu, pri čemu je lokalni nogometni klub ostvario zapažen takmičarski kontinuitet u okviru federalnog ranga takmičenja. Pored toga, u borilačkim sportovima evidentirani su pojedinačni uspjesi na kantonalnim i federalnim prvenstvima, što ukazuje na raznovrsnost sportskih aktivnosti uprkos manjem broju klubova u odnosu na veće urbane sredine. **Grad Lukavac** bilježi stabilan rad većeg broja klubova u ekipnim sportovima, a posebno su istaknuti rezultati omladinskih selekcija u nogometu i košarci koje su ostvarile plasmane na završnice kantonalnih i federalnih takmičenja. Nogometni klub iz Lukavca se izdvaja kao najorganizovaniji kolektiv sa kontinuiranim radom i jasnom strukturom takmičenja po uzrasnim kategorijama. U **Općini Kalesija** sportske aktivnosti su dominantno vezane za nogometne i karate klubove, pri čemu su sportisti iz borilačkih sportova ostvarili medalje na kantonalnim prvenstvima, dok nogometni kolektiv predstavlja okosnicu organizovanog sportskog djelovanja u ovoj lokalnoj zajednici. **Grad Gračanica** se ističe uspjesima u malom nogometu i borilačkim sportovima, gdje su klubovi ostvarili zapažene plasmane na federalnom nivou takmičenja. Posebno je značajan kontinuitet rada u mlađim kategorijama, što daje osnovu za dugoročnu stabilnost sportskog sistema u ovoj sredini. U **Srebreniku** se sportske aktivnosti najvećim dijelom realizuju kroz nogometne i košarkaške kolektive, pri čemu je evidentiran stabilan takmičarski angažman i učešće omladinskih selekcija na kantonalnim prvenstvima. Iako resursi nisu na nivou većih gradova, primjetan je organizovan pristup i održavanje kontinuiteta rada.

**Općina Kladanj**, kao manja lokalna zajednica, bilježi aktivnosti kroz ograničen broj klubova, ali sa prisutnim rezultatima u individualnim sportovima i redovnim učešćem nogometnog kolektiva u ligaškom sistemu takmičenja. U **Čeliću i Teočaku** sportske aktivnosti se odvijaju kroz manji broj organizacija, dominantno u nogometu i borilačkim sportovima, gdje su zabilježeni pojedinačni uspjesi na kantonalnom nivou, što potvrđuje postojanje sportskog potencijala uprkos ograničenim kapacitetima. Sagledavajući navedene pokazatelje, može se zaključiti da sportske organizacije u svim jedinicama lokalne samouprave daju mjerljiv doprinos razvoju sporta kroz takmičarske rezultate, rad sa mladima i organizaciju sportskih aktivnosti, ali da su razlike u infrastrukturnim i finansijskim kapacitetima i dalje ključni faktor koji utiče na domet ostvarenih rezultata. Sport u Tuzlanskom kantonu u 2025. godini pokazao je raznovrsnost i značaj u svim općinama i gradovima. U toku godine zabilježeni su brojni uspjesi i događaji koji su doprinijeli razvoju sporta, okupljanju zajednice i afirmaciji mladih sportista.

- Tuzla je bila domaćin Federalnog takmičenja u košarci za učenike osnovnih i srednjih škola u SKPC Mejdan, te domaćin reprezentacije BiH u košarci i rukometu.
- Banovići su se istakli kroz FK „Budućnost“, koji je zauzeo četvrto mjesto u Prvoj ligi Federacije BiH, dok je ŽKK „RMU“ Banovići nastupao u Premijer ligi BiH i međunarodnoj WABA ligi. IOK „Tigar 119“ bio je član Premijer lige BiH u invalidnom sportu.
- Doboj Istok ostvario je značajne rezultate kroz NK Doboj Istok (prvo mjesto u Prvoj ligi TK), STK „Spin“ (drugo mjesto u Prvoj ligi Federacije BiH), dok su pojedinci poput Mešića Ismeta u šahu i Halilovića Osmana u karateu postali državni prvaci i nastupili na evropskim i svjetskim prvenstvima.
- Gračanica bilježi uspjehe nogometnih klubova u kantonalnim ligama i pojedinaca u borilačkim sportovima na državnom nivou.
- Lukavac imao je rukometni klub u državnoj ligi, a sportisti su nastupali u reprezentaciji BiH u karateu i atletici, kada je u pitanju sport lica sa invaliditetom neprikosnovene rezultate na ovom području pravi SKISO Sinovi Bosne Lukavac.
- Srebrenik je ostvario plasman omladinskih nogometnih selekcija na federalni nivo, naglašavajući rad s mladima.
- Kalesija dala je karatiste s medaljama na državnim prvenstvima, a nogometni klubovi su nastupali u Drugoj ligi TK.
- Kladanj postigao je zapažene rezultate u stonom tenisu.
- Teočak održavao je kontinuitet kroz lokalne turnire i nastupe nogometnih klubova u kantonalnim ligama.
- Živinice ostvarile su uspjehe u rukometu, nogometu i karateu, RK Konjuh Živinice izborio je plasman u Evropu, iako bez potpuno aktivnog sportskog saveza, značajne rezultate ostvaruje i SKOSI Živinice.
- Sapna je kroz školska takmičenja dala mlade sportiste koji su se plasirali na kantonalni nivo, a na području ove općine egzistira uspješan sportski kolektiv OKI Drina koji nastupa u Premijer ligi BiH u sjedećoj odbojci<sup>2</sup>

U septembru 2025. godine, Tuzlanski kanton je po prvi put u historiji bio domaćin jednog od najprestižnijih sportskih događaja na svjetskoj sceni 71. Svjetskog prvenstva u sportskom ribolovu, koje je održano na jezeru Modrac (Lukavac i Tuzla). Na prvenstvu su sudjelovale reprezentacije iz preko 30 država i više od 200 takmičara, uz gotovo 400 učesnika uključujući trenere, sudije i članove delegacija, što je učinilo jezero Modrac centrom ribolovnog svijeta tokom trajanja manifestacije. Ovaj događaj je rezultat dugogodišnje pripreme i koordinacije Sportskog ribolovnog saveza BiH, domaćina Sportsko-ribolovnog društva „Smud“ Lukavac, SRD „Tuzla“ i partnerskih institucija. Organizacija prvenstva uključivala je značajna infrastrukturna ulaganja na obali i takmičarskoj stazi, uz podršku Vlade Tuzlanskog kantona i gradova Lukavca i Tuzle. Ministarstvo je, zajedno s ostalim nivoima vlasti, finansijski potpomoglo organizaciju prvenstva, čime je potvrđena strateška



<sup>2</sup> Izvještaj o radu Sportskog saveza Tuzlanskog kantona za 2025. godinu

opredijeljenost za razvoj sporta, ali i sportskog turizma u kantonu. Učešće ovako velikog broja sportista, trenera, sudija i pratećih službi imalo je snažan efekat na lokalnu ekonomiju i turizam smještajni kapaciteti u okolini jezera bili su gotovo u potpunosti popunjeni tokom trajanja takmičenja, a prisutni su bili i brojni gosti i ljubitelji sportskog ribolova iz inozemstva. Osim sportskog nadmetanja, prvenstvo je predstavljalo i platformu za promociju prirodnih ljepota jezera Modrac i šire regije, stvarajući pozitivnu sliku Tuzlanskog kantona na međunarodnoj sceni. Ovo prvenstvo nije samo sportski događaj, nego i dokaz da kanton može biti domaćin međunarodnih sportskih manifestacija najviše razine, čime se dodatno jača sportska tradicija, razvija sport kao društvena vrijednost i doprinosi razvoju omladine kroz uključivanje u aktivnosti na lokalnom i međunarodnom nivou. Održavanje Svjetskog prvenstva u sportskom

ribolovu na jezeru Modrac pokazalo je da Tuzlanski kanton predstavlja značajan turistički i sportski potencijal. Više od 150 volontera aktivno je učestvovalo u pripremi i organizaciji manifestacije, uključujući čišćenje i uređenje jezera, što je doprinijelo stvaranju izvanrednih uslova za takmičenje. Ovaj događaj je velika stvar za naš kanton i potvrđuje da u budućnosti možemo ravnopravno parirati svim regijama u organizaciji vrhunskih međunarodnih sportskih događaja, jačajući sportski i turistički razvoj. Za unapređenje sportskog potencijala jezera Modrac u Tuzlanskom kantonu, u budućnosti bi trebalo kontinuirano ulagati u infrastrukturu i organizaciju sportskih manifestacija.



Prioriteti uključuju izgradnju i održavanje takmičarskih staza, uređenje obale i pristupnih zona, te obezbjeđivanje potrebne logistike za međunarodna takmičenja. Posebna pažnja trebala bi biti posvećena razvoju ekoloških i rekreativnih aktivnosti, uključujući podršku inicijativama poput Eko-ronilačke grupe invalida, koja već aktivno roni i doprinosi čišćenju jezera i očuvanju vodene sredine. Ova grupa predstavlja spoj sporta, inkluzije i zaštite okoliša, što dodatno osnažuje društvenu vrijednost sporta u kantonu. Iskustvo Svjetskog prvenstva u sportskom ribolovu u Lukavcu pokazalo je da sport i turizam mogu biti snažno povezani. U budućnosti bi trebali razvijati ovu sinergiju, planirajući sportske događaje koji istovremeno jačaju turistički potencijal kantona.

#### **4 DJELATNOSTI SPORTSKIH SAVEZA TUZLANSKOG KANTONA**

##### **4.1 Sportski savez Tuzlanskog kantona**

Na osnovu člana 27. Zakona o sportu propisano je da se sportski savezi općina i granski sportski savezi Kantona udružuju u Sportski savez kantona. Sportski savez Tuzlanskog kantona osnovan je 1998. godine na inicijativu tadašnjeg Ministarstva za obrazovanje, nauku, kulturu i sport Tuzlanskog kantona. Osnovni zadaci ove organizacije su da kreira politiku sporta u svim segmentima na nivou Kantona. Organi Sportskog saveza Tuzlanskog kantona su Skupština, Predsjedništvo, Izvršni odbor i Nadzorni odbor. Skupština je vrhovno tijelo, a izvršni organ, koji ujedno rukovodi Sportskim savezom je Predsjedništvo Sportskog saveza.

Sportski savez Tuzlanskog kantona je krovna organizacija u oblasti sporta na nivou Kantona i kao takva nadležna je za:

- a) organizovanje poslova izrade radne verzije Strategije razvoja sporta Kantona,
- b) organizovanje poslova izrade radne verzije Godišnjeg programa razvoja sporta Kantona u skladu sa Strategijom,
- c) organizaciju i provođenje sistema ligaškog takmičenja na nivou Kantona,
- d) saradnju sa nadležnim sportskim organizacijama i organima Bosne i Hercegovine, entiteta, Kantona, Brčko Distrikta Bosne i Hercegovine i drugih nivoa administrativnog organizovanja,
- e) zastupanje i predstavljanje sporta u Federaciji BiH,
- f) obavljanje administrativnih, stručnih i drugih poslova u oblasti sporta, u skladu sa Zakonom sportu.

Za obavljanje navedenih stručnih poslova Sportski savez Tuzlanskog kantona sufinansira se iz sredstava predviđenih za sport u Budžetu Tuzlanskog kantona. Ministarstvo je u 2025. godini nastavilo sa sufinansiranjem stručnih poslova Sportskog saveza Tuzlanskog kantona. Sportski savez Tuzlanskog kantona u svom izvještaju za 2025. godinu potvrđuje da je bio jedan od ključnih nosilaca sportskog života u Tuzlanskom kantonu. Savez funkcioniše kao krovna organizacija koja okuplja kantonalne saveze različitih sportova, gradske i općinske sportske saveze, te klubove koji nemaju vlastiti kantonalni savez. Skupština broji 25 članova, dok je Upravni odbor tokom 2025.godine održao tri sjednice. U kancelariji Saveza rade generalni sekretar i stručni saradnik, što pokazuje da i mali, ali efikasan tim može koordinirati veliki broj aktivnosti. Tokom 2025. godine Savez je realizovao niz značajnih projekata: organizaciju Izboru sportiste godine TK (31. po redu), Malih olimpijskih igara za učenike osnovnih i srednjih škola, Federalnog takmičenja u košarci u SKPC Mejdan, kao i Svjetskog prvenstva u ribolovu na jezeru Modrac. Osim toga, Sporetski savez TK je aktivno učestvovao u pripremi školski sportskih stipendija, radu komisija Ministarstva i pružao stručnu pomoć strukovnim savezima u organizaciji međunarodnih utakmica. Posebno je važno naglasiti izuzetnu saradnju Saveza s Ministarstvom sve aktivnosti, od planiranja do realizacije, vođene su kooperativno, uz visoku profesionalnost i koordinaciju. Unapređenja su vidljiva i u oblasti planiranja ovaj Savez je pripremio materijal za izradu Nacrta strategije sporta Tuzlanskog kantona, koji je uvršten u dnevni red Savjeta za sport. Također, održavaju elektronsku evidenciju o svim registrovanim sportskim organizacijama, sportskim manifestacijama i rezultatima, u skladu sa Pravilnikom o vođenju Registra pravnih osoba u oblasti sporta. Kroz ove aktivnosti, Sportski savez TK pokazao je da je više od administrativnog tijela oni su organizatori, koordinatori i pokretači sportskog života u Tuzlanskom kantonu. Njihov rad osigurava kontinuitet takmičenja, unapređuje sportske procese i pruža neophodnu podršku mladim sportistima, čime doprinosi da Tuzlanski kanton ostane jedna od vodećih regija u razvoju sporta u Bosni i Hercegovini. Pored strateških i administrativnih aktivnosti, Sportski savez Tuzlanskog kantona aktivno se uključuje u operativni rad na terenu. Budući da dobro poznaju materiju što im omogućava da efikasno koordiniraju sve aspekte organizacije sportskih događaja. Savez redovno učestvuje u pripremi i realizaciji reprezentativnih utakmica u SKPC



Mejdan, pružajući stručnu i logističku podršku, uključujući tehničku organizaciju, protokole takmičenja i koordinaciju s klubovima i savezima.

Ministarstvo je u 2025. godini, u okviru planiranih budžetskih sredstava za oblast tjelesne kulture i sporta, za sufinansiranje stručnih poslova Sportskog saveza Tuzlanskog kantona izdvojilo ukupno 70.000,00 KM, čime je osigurana podrška administrativno-stručnim, koordinacionim i organizacionim aktivnostima Saveza na nivou Kantona.<sup>3</sup>

#### *4.2 Sportski savez osoba sa invaliditetom Tuzlanskog kantona*

Sportski savez osoba sa invaliditetom Tuzlanskog kantona je krovna organizacija u oblasti sporta lica sa invaliditetom koja okuplja invalidna lica bez obzira na porijeklo nastanka invaliditeta. Savez je osnovan radi zadovoljavanja potreba lica sa invaliditetom kroz rekreativne i sportske aktivnosti, a u svrhu unapređenja zdravstvenog i psihičkog stanja takvih lica.


Sportski savez osoba sa invaliditetom nadležan je za:

- a) organizovanje i provođenje sistema ligaškog takmičenja za osobe sa invaliditetom na nivou Kantona,
- b) zastupanje i predstavljanje sporta za osobe sa invaliditetom,
- c) organizovanje poslova izrade radne verzije Strategije razvoja sporta Kantona, kao i godišnjeg programa razvoja sporta Kantona u skladu sa Strategijom, u dijelu koji se odnosi na sport osoba sa invaliditetom,
- d) saradnju sa nadležnim sportskim organizacijama i organima Bosne i Hercegovine, entiteta, Kantona, Brčko Distrikta Bosne i Hercegovine i drugih nivoa administrativnog organizovanja, u dijelu koji se odnosi na sport osoba sa invaliditetom,
- e) obavljanje drugih poslova u skladu sa zakonom i zakonskim propisima.

Za obavljanje navedenih stručnih poslova Sportski savez osoba sa invaliditetom Tuzlanskog kantona sufinansira se iz sredstava predviđenih za tjelesnu kulturu i sport u Budžetu Tuzlanskog kantona, za 2025. godinu iz Budžeta Tuzlanskog kantona za ove namjene urošeno je 22.000,00 KM. Sportski savez osoba sa invaliditetom Tuzlanskog kantona je u 2025. godini imao aktivnu ulogu u organizaciji i realizaciji takmičenja te afirmaciji sporta osoba sa invaliditetom. Savez je bio tehnički organizator i domaćin Državnog prvenstva u sportskom ribolovu za osobe sa invaliditetom, održanog 21. i 22. juna u mjestu Kiseljak kod Tuzle, gdje su takmičari Saveza ostvarili zapažene plasmane, a članovi ekipe iz SSOSI TK su se uspješno nadmetali u pojedinačnoj i ekipnoj konkurenciji. Osim toga, savezni takmičari su bili aktivni i u drugim disciplinama i manifestacijama prilagođenim osobama sa invaliditetom širom Bosne i Hercegovine, čime su dodatno podigli vidljivost i značaj invalidskog sporta u kantonu i šire. Organizacija takvih takmičenja, uz podršku resornih ministarstava TK, predstavlja važan korak u stvaranju inkluzivnog sportskog okruženja koje motiviše takmičare da se bave sportom i ostvaruju svoje potencijale. Također je značajno istaknuti da su institucije Tuzlanskog kantona, uključujući Ministarstvo za boračka pitanja TK, povećale sredstva za finansiranje sportskih aktivnosti osoba sa invaliditetom u 2025. godini, što dodatno jača kapacitete klubova i sportista da se pripremaju i učestvuju na takmičenjima. Ove aktivnosti Saveza ne samo da doprinose takmičarskom uspjehu, već i socijalnoj inkluziji, rehabilitaciji i unapređenju kvaliteta života osoba sa invaliditetom, potvrđujući sport kao snažan instrument zajedništva i aktivnog sudjelovanja u društvu. U 2025. godini sport lica sa invaliditetom u Tuzlanskom kantonu ostvario je niz zapaženih rezultata koji potvrđuju da sportisti s invaliditetom mogu biti ponos regije i Bosne i Hercegovine. Streljački klub osoba sa invaliditetom Živinice (SKOSI Živinice) nastavio je tradiciju vrhunskih sportskih rezultata na domaćim i međunarodnim takmičenjima, gdje su njegovi takmičari redovno predstavljali reprezentaciju BiH i osvajali medalje. Na

<sup>3</sup> Izvještaj o radu Sportskog saveza Tuzlanskog kantona za 2025. godinu

takmičenjima Federalnog kupa BiH u streljaštvu za osobe sa invaliditetom, sportaši iz Živinica ostvarili su odlične plasmane uključujući prvo i drugo mjesto u pojedinačnim kategorijama, kao i snažan ekipni plasman u ženskoj konkurenciji. Rezultati SKOSI Živinice nisu ostali samo na nivou Federacije na Evropskom i Svjetskom prvenstvu njihovi takmičari postigli su zapažene rezultate, uključujući novi državni rekord u disciplini SH1 R6 i normu za svjetsko prvenstvo 2026 koju je ostvario takmičar Jozo Kaldrndžić. Ovi uspjesi su još jednom potvrdili da invalidski sport u našem kantonu ne samo da živi, nego i napreduje. Ključno je naglasiti da takmičari SKOSI Živinice nisu samo takmičari oni su reprezentativci Bosne i Hercegovine, čime doprinose promociji države na međunarodnoj sceni i inspirišu mlade sličnih izazova da se aktivno uključe u sport. Takav razvoj događaja pokazuje da je inkluzija kroz sport uspješna, da se socijalna integracija osoba s invaliditetom osnažuje kroz takmičenja i reprezentativne nastupe, te da Tuzlanski kanton ima jedan od najaktivnijih i najuspješnijih invalidskih sportskih pokreta u zemlji. Sportski klub invalida sjedeće odbojke "Sinovi Bosne" iz Lukavca je u 2025. godini ostvario izvanredne rezultate koji su dodatno unaprijedili poziciju invalidskog sporta u



kantonu i Bosni i Hercegovini. Klub je obilježio 30 godina postojanja i sportskog djelovanja, što samo potvrđuje njihov dugogodišnji doprinos razvoju sporta osoba sa invaliditetom. Tokom sezone 2025. SKISO "Sinovi Bosne" su ostvarili niz značajnih sportskih rezultata: bili su viceprvaci Evrope u Ligi prvaka sjedeće odbojke na turniru u Leverkusenu, gdje su ostvarili plasman u finale protiv najjačih evropskih timova, te su savladali jake predstavnike kao što je poljski prvak na grupnoj fazi takmičenja. Za svoj rad i ponašanje na terenu, "Sinovi Bosne" su osvojili i priznanje za Fair play ekipu godine u invalidskom sportu, čime su potvrdili reputaciju kluba koji ne samo da postiže vrhunske rezultate, nego i promoviše vrijednosti sportskog ponašanja i zajedništva.<sup>4</sup> Ministarstvo

će i u narednom periodu nastaviti razvijati kvalitetnu i konstruktivnu saradnju sa predstavnicima Sportskog saveza osoba sa invaliditetom, kako bi se osigurala bolja uključenost osoba sa invaliditetom u sportske aktivnosti i unaprijedio razvoj vrhunskog i rekreativnog sporta prilagođenog njihovim potrebama.

<sup>4</sup> Sportski savez osoba sa invaliditetom TK

#### 4.3 Školski sportski savez Tuzlanskog kantona

Ministarstvo je tokom 2023. godine uložilo značajne napore u jačanje kapaciteta Školskog sportskog saveza Tuzlanskog kantona, koji je do tada bio na ivici gašenja. Uzimajući u obzir važnost školskog sporta za razvoj fizičke kulture i zdravlja mladih, Ministarstvo je stavilo sve svoje resurse na raspolaganje kako bi ponovo aktiviralo Savez i omogućilo održavanje školsko-sportskih takmičenja u skladu sa zakonodavnim okvirom. Tako su školska sportska takmičenja-Male olimpijske igre Tuzlanskog kantona u 2023. godini po prvi put organizovana u skladu sa



zakonskim propisima, čime je omogućena transparentnost, pravičnost i profesionalizam u organizaciji. Uspješan povratak Saveza u 2023. godini omogućio je dalji razvoj i kontinuitet u 2025. godini, kada je Školski sportski savez Tuzlanskog kantona nastavio sa realizacijom svojih aktivnosti. Školski sportski savez Tuzlanskog kantona u školskoj 2024/25. godini organizovao je niz takmičenja u okviru kalendara Pedagoškog zavoda Tuzla. Učešće škola je povećano, a takmičenja su obuhvatila odbojku, košarku, nogomet, rukomet i atletiku. Finansijska sredstva za rad Saveza i organizaciju takmičenja osiguralo je Ministarstvo. Ove školske godine održana su sljedeća takmičenja :

##### ODBOJKA

kategorija	Datum održavanja	Škola domaćin	Broj škola učesnica	Broj učenika
Djevojčice V-VII	15.03.2024.	JU.OŠ."Druga osnovna škola" Gračanica	9	90
Dječaci V-VII	15.03.2024.	JU.OŠ."Brčanska Malta" Tuzla	8	96
Dječaci VIII-IX	25.03.2024	JU.OŠ. „Druga osnovna škola" Gračanica	12	125
Djevojčice VIII-IX	05.04.2025.	JU.OŠ. „Sapna" Sapna	13	128
Dječaci Srednja šk	07.04.2025	JU MSS Kalesija	11	120
Djevojčice Srednje šk	03.04.2025	JU MSS" Hasan Kikić" Gradačac	11	120

##### KOŠARKA

kategorija	Datum održavanja	Škola domaćin	Broj škola učesnica	Broj učenika
Djevojčice V-VII	14.04.2025.	JU OŠ „Grivice" Banovići	11	108
Dječaci V-VII	14.04.2025.	JU OŠ „Grivice" Banovići	6	61
Dječaci VIII-IX	15.04.2025.	JU OŠ „Banovići" Banovići	9	94
Djevojčice VIII-IX	15.04.2025.	JU OŠ „Banovići" Banovići	7	68
Dječaci Srednja šk	18.04.2025.	JU MSS „Musa Ćazim Ćatić" Kladanj	7	66
Djevojčice Srednje šk	17.04.2025.	JU MSS Banovići	4	35

**NOGOMET**

<b>kategorija</b>	<b>Datum održavanja</b>	<b>Škola domaćin</b>	<b>Broj škola učesnica</b>	<b>Broj učenika</b>
Dječaci V-VII	05.05.2025.	JU OŠ: "prva osnovna škola „Srebrenik	10	99
Dječaci VIII-IX	28.04.2025	JU OŠ „Pasci“ Tuzla	12	120
Dječaci Srednja šk	23.04.2025	JU MSS „Teočak“ Teočak	11	97

**RUKOMET**

<b>kategorija</b>	<b>Datum održavanja</b>	<b>Škola domaćin</b>	<b>Broj škola učesnica</b>	<b>Broj učenika</b>
Dječaci Osnovna škola	05.05.2025	JU OŠ: „Brijesnica“ Doboj Istok	5	50
Djevojčice Osnovna škola	05.05.2025.	JU OŠ: „Brijesnica“ Doboj Istok	5	50

Školska sportska takmičenja predstavljaju izuzetno važan alat u procesu odgoja i obrazovanja, jer ne samo da podstiču fizičku aktivnost među učenicima, već također igraju ključnu ulogu u oblikovanju njihovih socijalnih i emocionalnih vještina. Ova takmičenja nisu samo prilika za učenike da pokažu svoje sportske sposobnosti, već su i izvor motivacije za razvoj zdravih životnih navika, timskog duha i fair-playa. Kroz sudjelovanje u školskim sportskim aktivnostima, djeca od najranijeg uzrasta usvajaju principe olimpizma, što uključuje poštovanje drugih, dostojanstveno prihvatanje pobjeda i poraza, te razvijanje osjećaja odgovornosti i discipline. Jedan od ključnih benefita školskih sportskih takmičenja je i podsticanje zdravog načina života. U današnjem društvu, gdje su sedentaran način života i nepravilne prehrambene navike postali sve prisutniji, školska sportska takmičenja pružaju djeci priliku da redovno praktikuju fizičku aktivnost. Ovaj oblik fizičkog vježbanja od najranijih godina pomaže u razvoju zdravih tijela, smanjuje rizik od različitih bolesti, te doprinosi mentalnoj ravnoteži i emocionalnom zdravlju. Kroz takmičenja djeca ne samo da razvijaju fizičku spremnost, već i uče kako se nositi sa stresom i izazovima, što je izuzetno važno za njihov emocionalni razvoj. Međutim, da bi ovi benefiti postali stvarnost i imali dugoročni pozitivan uticaj, neophodna je kontinuirana saradnja svih relevantnih aktera. Prije svega, ključnu ulogu igra nastavno osoblje, koje mora biti edukovano i motivisano da podrži razvoj sportskih vještina među učenicima. Nastavnici tjelesnog odgoja i drugi stručnjaci u školama trebaju biti svjesni važnosti školske sportske aktivnosti, ne samo u kontekstu takmičenja, već i u smislu cjelokupnog razvoja djeteta.

Ministarstvo je za najbolje učesnike školskih sportskih takmičenja osiguralo stipendije, čime se dodatno podstiče razvoj školskog sporta i nagrađuju ostvareni rezultati. Tako smo po prvi put u 2025. godini imali i kategoriju **studentskih sportskih rezultata**, gdje je stipendije ostvarilo **10 studenata**, za šta je izdvojeno **3.000,00 KM**.

Kada su u pitanju učenici srednjih škola, stipendije je ostvarilo **78 srednjoškolaca**, za šta je izdvojeno **17.160,00 KM**, dok je za **153 učenika osnovnih škola** izdvojeno **29.390,00 KM**. Ukupno posmatrano, za stipendiranje sportskih rezultata učenika i studenata u 2025. godini izdvojeno je **49.550,00 KM**.

Ovakav vid podrške je izuzetno pohvalan jer predstavlja direktno ulaganje u mlade sportiste i dodatnu motivaciju za bavljenje sportom i ostvarivanje kvalitetnih rezultata. Sistem stipendiranja doprinosi afirmaciji školskog sporta, prepoznavanju talenata i stvaranju uslova za njihov dalji razvoj.

Međutim, u praksi bi rezultati i organizacija školskog sporta mogli biti još kvalitetniji kada bi se nastavnicima koji rade sa djecom omogućilo da dio radne norme (npr. polovinu) ostvaruju kroz rad u Školskom sportskom savezu, a drugu polovinu kroz redovnu nastavu. Trenutno značajan problem predstavljaju izostanci nastavnika sa redovne nastave kada je potrebno organizovati ili realizovati takmičenja, što otežava funkcionisanje sistema. Ovakvo rješenje bi doprinijelo boljoj organizaciji i efikasnijoj realizaciji školskih sportskih takmičenja.

Takođe, na okruglom stolu za nastavnike Tjelesnog i zdravstvenog odgoja, koji je održan u Tuzli, a na kojem je tema bila rad i organizacija školskih sportskih društava u školama, utvrđeno je da sve škole na području Tuzlanskog kantona imaju formirana školska sportska društva i da ona u velikoj mjeri funkcionišu u punom kapacitetu. U školama se redovno organizuju sportske sekcije, školska takmičenja i druge aktivnosti koje doprinose razvoju sporta među učenicima.

Ipak, određeni izazovi postoje na nivou gradskih i općinskih školskih sportskih društava, s obzirom na to da u većini gradova i općina na području Tuzlanskog kantona općinska takmičenja organizuju sportski savezi gradova i općina, što ukazuje na potrebu jasnijeg definisanja nadležnosti i jačanja institucionalnog okvira školskog sporta na lokalnom nivou.<sup>5</sup>

## **5. SPORTSKA INFRASTRUKTURA**

Sport kao djelatnost od posebnog interesa za Tuzlanski kanton, između ostalog, zahtijeva jasno i sistematsko sagledavanje sportskih kapaciteta i objekata u kojima se odvijaju sportske aktivnosti, trenažni procesi i takmičenja. Sveobuhvatan uvid u postojeću sportsku infrastrukturu predstavlja osnov za realno planiranje budućih ulaganja, pravilno usmjeravanje aktivnosti nadležnih institucija, kao i bolje razumijevanje stvarnih potreba sporta na području Tuzlanskog kantona.

### *5.1 Pregled postojećih sportskih objekata (u vlasništvu JLS i drugih subjekata)*

**Do 2025. godine Ministarstvo nije raspolagalo jedinstvenom, ažurnom i sveobuhvatnom evidencijom sportskih objekata po jedinicama lokalne samouprave, što je u značajnoj mjeri otežavalo planiranje, analizu i donošenje strateških odluka u oblasti sporta. Iz navedenih razloga, tokom 2025. godine, po prvi put je uspostavljena objedinjena evidencija sportskih objekata na području Tuzlanskog kantona, na osnovu podataka koje su dostavile jedinice lokalne samouprave.**

Podaci korišteni za izradu ove analize dostavljeni su zaključno sa 20.02.2026. godine. Evidencija ne obuhvata kompletno područje Tuzlanskog kantona, s obzirom na to da podatke nisu dostavile općine Kalesija, Kladanj, Teočak i Doboј Istok, kao ni gradovi Gračanica i Živinice, zbog čega Ministarstvo za navedene jedinice lokalne samouprave trenutno ne raspolaže podacima o sportskim objektima.

Analiza dostavljenih podataka pokazuje da sportsku infrastrukturu Tuzlanskog kantona dominantno čine otvoreni sportski objekti, prije svega stadioni, fudbalski tereni i višenamjenski sportski tereni na otvorenom. Najzastupljeniji tip sportskog objekta su stadioni i fudbalski tereni, što jasno ukazuje na činjenicu da je nogomet, kao najmasovniji sport, infrastrukturno najrazvijeniji na području Kantona. U znatno manjem obimu zastupljene su zatvorene sportske dvorane, koje su od posebnog značaja za razvoj dvoranskih sportova, školskog sporta, sporta djece i omladine, kao i za kontinuitet trenažnog procesa tokom zimskog perioda. Pored

<sup>5</sup> Školski sportski savez Tuzlanskog kantona

navedenog, evidentiran je i manji broj drugih sportskih objekata, poput teniskih terena i sličnih igrališta, koji uglavnom imaju lokalni karakter i ograničene kapacitete. **Vlasnička struktura sportskih objekata ukazuje da je značajan dio infrastrukture u javnom vlasništvu, odnosno u vlasništvu općina i gradova, što potvrđuje ključnu ulogu jedinica lokalne samouprave u obezbjeđivanju osnovnih uslova za bavljenje sportom.** Istovremeno, evidentiran je i određeni broj sportskih objekata u privatnom vlasništvu, posebno kada je riječ o komercijalnim sportskim centrima i specijaliziranim objektima. Kod dijela objekata vlasništvo nije precizno definisano ili je vezano za mjesne zajednice, sportske klubove ili druga pravna i fizička lica, što dodatno ukazuje na potrebu daljeg unapređenja i standardizacije evidencije sportskih objekata. **Posebno je važno istaći da, prema dostavljenim podacima, na području Tuzlanskog kantona ne postoji sportski bazen u javnom vlasništvu, dok se evidentirani bazeni nalaze isključivo u privatnom vlasništvu.** Ovakvo stanje predstavlja ozbiljno infrastrukturno ograničenje za razvoj plivačkih sportova, školskog sporta, sporta djece i omladine, kao i za provođenje rekreativnih i rehabilitacionih sportskih aktivnosti, te ukazuje na potrebu sistemskog pristupa rješavanju ovog infrastrukturnog nedostatka. Uspostavom ove evidencije Ministarstvo je po prvi put dobilo sistematizovan i objedinjeni pregled sportskih objekata po jedinicama lokalne samouprave, njihovoj vrsti, namjeni i vlasničkoj strukturi. Iako podaci još uvijek nisu potpuni, zbog nedostavljanja informacija od strane svih jedinica lokalne samouprave, ova evidencija predstavlja važan temelj za daljnje unapređenje planiranja, ravnomjerniji razvoj sportske infrastrukture i donošenje utemeljenih odluka u oblasti sporta na području Tuzlanskog kantona. **U ovu analizu nisu uključeni sportski objekti koji se koriste u sklopu osnovnih i srednjih škola, iako je značajan dio trenažnog procesa sportskih kolektiva na području Tuzlanskog kantona realiziran upravo u školskim sportskim dvoranama i drugim školskim sportskim prostorima.** Ministarstvo od 2021. godine kontinuirano ulaže sredstva u unapređenje sportske infrastrukture na području Tuzlanskog kantona, od kada je pokrenut javni poziv za sufinansiranje rekonstrukcije i opremanja sportskih objekata. **U periodu od 2021. do 2025. godine, putem navedenog javnog poziva, finansiranje je realizirano kroz ukupno 53 odobrena projekta, odnosno korisnika sredstava, pri čemu se pojedini projekti odnose na nastavak ili dodatno unapređenje ranije započetih ulaganja u iste sportske objekte odnosno nove LOT faze, te se navedeni broj ne može poistovjetiti s brojem pojedinačnih sportskih objekata.** Najveći i dugoročno najodrživiji efekat u razvoju sporta postigao bi se sistemskim ulaganjem u školsku infrastrukturu, posebno u izgradnju i rekonstrukciju fiskulturnih sala namijenjenih realizaciji nastave tjelesnog i zdravstvenog odgoja, ali i prilagođenih za provođenje sportskih aktivnosti i organizaciju sportskih i drugih društvenih manifestacija. Plansko i strateško usmjeravanje sredstava u ovu oblast imalo bi naročito pozitivan uticaj na manje općine koje se suočavaju sa izraženim odlaskom stanovništva, posebno mladih, jer bi se unaprijedili uslovi za kvalitetno provođenje slobodnog vremena i stvorile realne pretpostavke za postizanje boljih sportskih rezultata. **U 2025. godini iz sredstava kapitalnih ulaganja Vlade Tuzlanskog kantona započeto je izdvajanje značajnijih finansijskih sredstava za rekonstrukciju školskih objekata i sportskih sala, što predstavlja pozitivnu praksu koju je potrebno nastaviti u kontinuitetu.** Ovakva ulaganja imaju poseban značaj imajući u vidu da veliki broj sportskih klubova svoje trenažne procese realizuje upravo u fiskulturnim salama škola kao javnih ustanova, pri čemu za korištenje prostora plaćaju zakup. Istovremeno, značajan broj tih sala nije adekvatno opremljen niti u potpunosti funkcionalan za provođenje kvalitetnih trenažnih procesa. Kontinuiranim ulaganjem u školsku sportsku infrastrukturu Vlada Tuzlanskog kantona dodatno afirmiše sport kao oblast od javnog interesa i pokazuje opredijeljenost za racionalno i višestruko korisno korištenje javnih sredstava. Ovakav vid kapitalnih investicija ima dvostruki efekat unapređuje uslove rada u obrazovnom sistemu, a istovremeno jača institucionalne kapacitete sportskog sektora. Dodatna podrška sportskim organizacijama mogla bi se realizovati i kroz uspostavljanje povoljnijih uslova zakupa fiskulturnih sala za potrebe sportskih klubova, što podrazumijeva koordinisano i interesorno djelovanje Ministarstva obrazovanja i

nauke i nadležnog ministarstva za oblast sporta, uz podršku Vlade Tuzlanskog kantona, s ciljem stvaranja održivog i funkcionalnog modela korištenja postojeće infrastrukture.

### *5.2 Stanje i opremljenost objekata*


Prema podacima iz naše evidencije, svi objekti koji su obuhvaćeni našom evidencijom trenutno su u funkciji, a u dokumentaciji je navedeno da posjeduju pristup za osobe s invaliditetom. Važno je naglasiti da nismo vršili terenske posjete, te stoga ne možemo potvrditi da li svi navedeni objekti u praksi u potpunosti zadovoljavaju ove kriterije. Podaci na koje se oslanjamo prikupljeni su od strane lokalnih zajednica i predstavljaju najaktuelnije informacije koje imamo na raspolaganju.

Analizom prijava na naše javne pozive za sufinansiranje sportske infrastrukture jasno je da se na području Tuzlanskog kantona bilježi pojava novih objekata, što ukazuje na pozitivne trendove u razvoju sportske mreže. Primjeri uključuju novije objekte u Gračanici, Kladnju, Teočaku i Sapni, koji značajno doprinose dostupnosti sportskih sadržaja u tim općinama. S druge strane, u većim urbanim centrima poput Tuzle situacija je nešto drugačija iako dvorana JP SKPC Mejdan predstavlja značajan objekat, postojeći stadion i druga novija sportska infrastruktura su još uvijek nedovoljni ili nepostojeći, što ograničava mogućnosti za razvoj pojedinih sportova. Općina Kalesija, primjerice, raspolaže ogromnom, ali još uvijek nedovršenom dvoranom. Objekt je impozantan i tehnički kvalitetan, ali njegova veličina možda premašuje trenutne potrebe lokalne zajednice, što može otežati održivo korištenje i redovno održavanje. Ovi primjeri ukazuju na različite izazove i potencijale u oblasti sportske infrastrukture: dok u nekim općinama postoji potreba za osnovnim objektima, u drugim su objekti već značajni, ali njihova funkcionalnost i održivost zahtijevaju dodatnu pažnju.

### *5.3 Regionalne razlike i dostupnost infrastrukture*

U Tuzlanskom kantonu jasno se uočavaju regionalne razlike u razvoju i dostupnosti sportske infrastrukture, što utiče na mogućnost treniranja, organizaciju takmičenja i ukupnu uključenost stanovništva u sportske aktivnosti. Podaci ukazuju da sportski objekti nisu ravnomjerno raspoređeni niti su jednako razvijeni u svim općinama, a kvalitet i funkcionalnost često zavise od lokalnih kapaciteta i ulaganja. Banovići i Gračanica predstavljaju primjere sredina sa značajnijim objektima. Gradska sportska dvorana Banovići redovno se koristi za različite sportove, dok FK Budućnost Banovići posjeduje stadion koji je važan za lokalni fudbal. U Gračanici se bilježi izgradnja moderne dvorane, koja je značajna za razvoj rukometa i školskog sporta, dok se u upotrebi i dalje nalazi stara dvorana koja služi lokalnim klubovima. Rukomet je u ovoj općini posebno izražen, ali se aktivno praktikuju i fudbal i drugi sportovi. Doboj Istok raspolaže jednom dvoranom ograničenog kapaciteta, dok Živinice imaju staru dvoranu koja često zahtijeva rekonstrukciju jer je dotrajala, što se vidi i po učestalim prijavama na javne pozive za njeno održavanje. Lukavac se suočava sličnim problemima – postojeći sportski objekti su stariji i neadekvatni, a trenažni proces se nerijetko odvija u školskim dvoranama koje nisu dovoljno opremljene za ozbiljan sportski rad. Takve situacije povećavaju rizik od povreda i otežavaju sistematičan razvoj sportista. Pregledom cijelog Tuzlanskog kantona uočava se da manja općine, poput Gračanice, Kladnja, Teočaka i Sapne, bilježe izgradnju novih objekata, što poboljšava dostupnost sportskih sadržaja, ali broj objekata i dalje ne zadovoljava u potpunosti potrebe lokalnog stanovništva. S druge strane, veći urbani centri poput Tuzle imaju razvijeniju infrastrukturu, ali i tu postoje ograničenja – stadion i noviji objekti nedostaju, dok Mejdan dvorana dominira i pokriva veći dio sportskih aktivnosti.

Regionalne razlike utiču i na masovnost sportskih aktivnosti: u urbanim centrima popularni su fudbal i košarka, dok u manjim sredinama prednjače borilački sportovi i rukomet, što je dijelom povezano s dostupnošću objekata i trenažnog kadra. Ove razlike ukazuju na potrebu planiranja razvoja infrastrukture u skladu s lokalnim potrebama i potencijalom stanovništva, kako bi svi dijelovi kantona imali ravnomjeran pristup sportskim sadržajima i sigurnim uslovima za treniranje.



## **6 STRUČNA LICA U OBLASTI SPORTA NA PODRUČJU TUZLANSKOG KANTONA**

U segmentu stručnih kadrova, poseban značaj ima normativno uređenje pitanja stručnog rada u sportu. U skladu sa članom 52. Zakona o sportu, sportske organizacije kao pravna lica koja obavljaju sportsku djelatnost obavezne su da stručne poslove povjere isključivo osobama koje su osposobljene za rad u sportu, odnosno trenerima, kondicijskim trenerima i instruktorima sa odgovarajućim kvalifikacijama. Ovakvo zakonsko rješenje postavlja jasne standarde profesionalizacije sportskog sektora i smanjuje prostor za nestručan rad, posebno u radu sa djecom i mladima. Dosljedna primjena ove odredbe ima višestruki efekat. Prije svega, osigurava kvalitetniji i sistematičniji trenažni proces, zasnovan na savremenim metodološkim i pedagoškim principima, što je od presudne važnosti za pravilan razvoj sportista u mlađim dobnim kategorijama. Istovremeno, stručno vođen rad sa seniorskim selekcijama doprinosi unapređenju takmičarskih performansi, smanjenju rizika od povreda i postizanju dugoročnije rezultatske stabilnosti klubova. Poseban potencijal u ovom segmentu predstavlja kadar školovan na Univerzitet u Tuzli, odnosno na Fakultet za tjelesni odgoj i sport Univerziteta u Tuzli. Uključivanjem diplomiranih profesora sporta i tjelesnog odgoja, kao i drugih stručnjaka iz oblasti sportskih nauka, u rad sportskih organizacija, omogućava se transfer naučnih i stručnih saznanja u praktični trenažni proces. Time se podiže ukupni nivo stručnosti u sportu, jača institucionalni kapacitet klubova i stvaraju pretpostavke za kontinuirano unapređenje sportskih rezultata na području Tuzlanskog kantona.

Radi sagledavanja stanja u pogledu stručnih lica u oblasti sporta i njihovog položaja na tržištu rada, Ministarstvo je uputilo zahtjev Službi za zapošljavanje Tuzlanskog kantona za dostavu podataka o broju nezaposlenih lica sa završenim obrazovanjem iz oblasti sporta i srodnih struka koje su, u skladu sa Zakonom o sportu Tuzlanskog kantona, prepoznate kao stručna lica za rad u sportu (trener, kondicioni trener, instruktor).

Prema dostavljenim podacima, na evidenciji Službe za zapošljavanje Tuzlanskog kantona ukupno su evidentirana **54 nezaposlena lica** sa odgovarajućim obrazovanjem iz oblasti sporta. Od navedenog broja, **41 lice** ima zvanje profesora tjelesnog i zdravstvenog odgoja, **11 lica** ima zvanje sportskog trenera, dok su evidentirana i **jedno lice sa zvanjem menadžera sporta** te **jedno lice sa zvanjem predavača kineziologije**. Teritorijalna raspodjela nezaposlenih stručnih kadrova pokazuje izraženu koncentraciju u većim urbanim sredinama. Najveći broj nezaposlenih profesora tjelesnog i zdravstvenog odgoja evidentiran je u Tuzli (19 lica), dok su Banovići i Gradačac zabilježili po 5 nezaposlenih lica ove struke. Kada je riječ o sportskim trenerima, čak 9 nezaposlenih evidentirano je u Tuzli, dok Banovići i Gradačac imaju po jednog nezaposlenog sportskog trenera, a u ostalim općinama i gradovima nema evidentiranih nezaposlenih lica ove struke. Ovakva struktura otvara pitanje da li u pojedinim lokalnim zajednicama postoji potpuna zaposlenost stručnih kadrova u sportu ili, pak, nedostatak određenih profila zanimanja, što ukazuje na moguće regionalne neravnoteže između ponude i potražnje stručnih lica u sportu.

Dodatni uvid u buduće kretanje tržišta rada u sportu daje analiza podataka o obrazovanju novih kadrova, koje je dostavio **Fakultet za tjelesni odgoj i sport Univerziteta u Tuzli**. U akademskoj 2023/2024. godini na studijskom programu Tjelesni odgoj i sport bilo je upisano 25 studenata, dok je program Sportskog trenera pohađao 31 student, a diplomiralo je ukupno 20 studenata. U akademskoj 2024/2025. godini zabilježen je rast interesa za studij Sportskog trenera, sa 40 upisanih studenata, dok je broj upisanih na programu Tjelesni odgoj i sport iznosio 19, a diplomiralo je 17 studenata. U akademskoj 2025/2026. godini bilježi se daljnji rast broja upisanih studenata na oba programa, sa 30 studenata na programu Tjelesni odgoj i sport i 41 studentom na programu Sportskog trenera, dok je broj diplomiranih ostao stabilan i iznosio 20.

Navedeni podaci ukazuju da se na godišnjem nivou na tržište rada kontinuirano plasira značajan broj novih stručnih kadrova u oblasti sporta, što, u kombinaciji sa postojećim brojem nezaposlenih lica, zahtijeva pažljivo planiranje zapošljavanja i razvoja sportskog sistema, posebno na lokalnom nivou. Važno je istaći da Fakultet za tjelesni odgoj i sport obrazuje kadrove kroz dva akreditovana programa formalnog obrazovanja – četverogodišnji studij Tjelesni odgoj i sport (240 ECTS), kojim se stiče zvanje bachelor tjelesnog odgoja i sporta, te trogodišnji studij Edukacija trenera u sportu (180 ECTS), kojim se stiče zvanje bachelor sportski trener, uz mogućnost usmjerenja na sportskog, kondicionog ili fitness i personalnog trenera. Pored formalnih studija, Fakultet provodi i program neformalnog obrazovanja kroz kraće kurseve i cikluse osposobljavanja stručnih lica za rad u sportu, namijenjene licima koja nemaju formalne stručne kvalifikacije, a čije je osposobljavanje propisano Zakonom o sportu Tuzlanskog kantona, član 58.

Sve navedeno ukazuje da Tuzlanski kanton raspolaže značajnim obrazovnim kapacitetima za stvaranje stručnih kadrova u sportu, ali i da postoji potreba za boljim povezivanjem sistema obrazovanja, tržišta rada i realnih potreba sportskih organizacija, kako bi se osiguralo efikasnije zapošljavanje postojećih kadrova i održiv razvoj sporta u narednom periodu.

### *6.1 Potreba za kontinuiranom edukacijom stručnih lica u oblasti sporta i sportskih radnika*

U cilju daljeg unapređenja kvaliteta rada u sportskim organizacijama, neophodno je osigurati kontinuiranu edukaciju stručnih lica u oblasti sporta, kako bi se njihova znanja i kompetencije usklađivale sa savremenim standardima struke i zahtjevima trenažnog procesa. Stručni rad u sportu ne može se posmatrati kao statična kategorija, već kao dinamičan proces koji podrazumijeva stalno stručno usavršavanje, posebno u segmentima sigurnosti sportista,

prevencije povreda, metodike rada i primjene novih naučnih saznanja. U narednom periodu, kada su u pitanju stručna lica, planirana je realizacija inicijative Savjeta za sport Tuzlanskog kantona kojom je predloženo organizovanje edukacije iz oblasti pružanja prve pomoći za trenere i druga stručna lica angažovana u sportskim organizacijama. Ministarstvo će razmotriti mogućnost sufinansiranja ove edukacije, imajući u vidu njen značaj za sigurnost sportista i podizanje standarda rada u klubovima. Opredjeljenje je da se i u narednim godinama, u skladu sa raspoloživim budžetskim sredstvima i iskazanim potrebama sa terena, svake godine sufinansira najmanje jedan vid stručne edukacije za lica angažovana u sportu, čime bi se sistemski jačali kapaciteti sportskog sektora. Realizacija ovih aktivnosti planirana je u saradnji sa Sportskim savezom Tuzlanskog kantona, koji bi imao koordinacionu i organizacionu ulogu u provođenju programa edukacije, kao krovna sportska organizacija na nivou Tuzlanskog kantona.

Jedan od značajnih segmenata razvoja sporta odnosi se na kontinuiranu edukaciju stručnih lica koja rade u sportskim organizacijama. **Kao primjer dobre prakse u ovoj oblasti može se izdvojiti Grad Lukavac, koji je kroz strateški pristup razvoju sporta prepoznao važnost stručnog osposobljavanja kadrova u sportu.** Naime, u Strategiji razvoja sporta grada Lukavac definisan je strateški cilj koji se odnosi na unapređenje sportskih vrijednosti na području grada Lukavac, u okviru kojeg je kao jedan od prioriteta utvrđeno povećanje broja stručnih lica osposobljenih za rad u sportu. Također, kroz strateški cilj koji se odnosi na povećanje broja programa i projekata sportskog odgoja, obrazovanja, sportske rekreacije i sportskih manifestacija, prepoznata je potreba za povećanjem broja projekata sportske edukacije i obrazovanja, pri čemu je kao konkretna mjera akcionog plana definisana edukacija stručnih lica iz oblasti sporta. Kroz proces kategorizacije sportskih klubova na području grada Lukavac, koji se provodi od 2022. godine kao jedna od mjera Strategije razvoja sporta, uočen je trend velikog broja sportskih instruktora i entuzijasta koji aktivno rade u sportskim klubovima, ali bez formalnog obrazovanja iz oblasti tjelesnog odgoja i sporta. **U cilju unapređenja kvaliteta rada sa djecom i mladima, Grad Lukavac je u saradnji sa Fakultetom za tjelesni odgoj i sport Univerziteta u Tuzli uspostavio partnerski odnos s ciljem edukacije sportskih instruktora koji djeluju u sportskim klubovima na području grada.** U okviru ove saradnje, tokom 2024. i 2025. godine realizovan je program edukacije sportskih instruktora kroz Modul 1, za koji je Grad Lukavac objavio javni poziv za učešće instruktora iz sportskih klubova sa svog područja. S obzirom na to da je u prvoj godini manji broj instruktora, u odnosu na ukupan broj onih koji rade sa djecom, završio edukaciju i stekao uslove za certificiranje, saradnja sa Fakultetom je obnovljena kako bi se omogućilo osposobljavanje većeg broja instruktora. Sve troškove edukacije u potpunosti je snosio Grad Lukavac, a kroz realizaciju Modula 1 ukupno je educirano 50 instruktora iz 17 sportskih klubova sa područja grada Lukavac. U 2026. godini planirana je realizacija Modula 2, kao nastavak ovog procesa edukacije. Kroz ovakav pristup Grad Lukavac nastoji osigurati da se rad sa djecom i mladima u sportu temelji na pedagoškim i stručnim principima, s ciljem da se sportskim instruktorima, koji su često entuzijasti i dugogodišnji sportski radnici, pruže osnovna pedagoška i stručna znanja. Time se doprinosi stvaranju kvalitetnijeg sistema rada sa djecom, gdje entuzijazam i iskustvo instruktora dobija dodatnu vrijednost kroz sticanje potrebnih stručnih kompetencija, što u konačnici predstavlja značajnu korist kako za sportski sektor, tako i za širu društvenu zajednicu.<sup>6</sup>

<sup>6</sup> Grad Lukavac

## **7. SPORT DJECE I MLADIH NA PODRUČJU TUZLANSKOG KANTONA**

### *7.1 Masovnost i dostupnost sportskih aktivnosti djeci i mladima*

Razvoj sporta u Tuzlanskom kantonu počinje od omladinskih uzrasnih kategorija, jer su djeca i adolescenti ključni za održiv i kvalitetan sportski sistem. Fizička neaktivnost mladih predstavlja ozbiljan problem koji ugrožava njihov razvoj i zdravlje, stoga su inicijative usmjerene na uključivanje djece u sport od najranije dobi. Na području Tuzlanskog kantona veliki broj mladih redovno učestvuje u sportskim aktivnostima, pri čemu je karate najmasovniji sport, dok mu slijedi fudbal, a zatim odbojka, rukomet, košarka i atletika. U manjim sredinama, gdje su sportske infrastrukture ograničene, klubovi se suočavaju s nedostatkom prostora, finansijskih sredstava i kvalifikovanih trenera, što ograničava broj organizovanih takmičenja i razvojni potencijal mladih sportista. Ipak, i u ovim sredinama postoje značajni uspjesi i inicijative: Sapna je organizovala omladinsku ligu Tuzlanskog kantona za mlade pionire i turnire za dječake različitih godišta, dok Doboj Istok bilježi vrhunski rezultat u stonom tenisu mlađeg kadeta Zejda Hodžića, koji je osvojio prvo mjesto u BiH. Veće sredine, poput Banovića, Gračanice, Kalesije, Kladnja, Lukavca i Srebrenika, posjeduju razgranate strukture omladinskih selekcija. U Banovićima, FK „Budućnost“ ima sve takmičarske selekcije od pjetlića do juniora, ŽKK „RMU“ Banovići pokriva sve uzrasne selekcije, a Omladinski rukometni klub „Rudar“ takmiči se isključivo kroz omladinske selekcije. Gračanica organizuje turnire i takmičenja u malom fudbalu za seniore, kadete i pionire, kadetsko prvenstvo grada u šahu, kao i ulične trke učenika osnovnih i srednjih škola, a omladinske kategorije su redovno nagrađivane u izborima sportista. U Kalesiji, klubovi pokrivaju sve uzrasne kategorije: FK „Bosna“ ima predpionire, pionire, kadete i juniore; FK „Sloga“ Tojšići takmiči se sa predpionirima, pionirima i kadetima; ŽOK „Bosna“ i Košarkaški klub „Bosna“ uključuju pionire, kadete i juniore, a u izboru sportista nagrađeni su cicibani i omladinske selekcije. Kladanj bilježi aktivnost NK „Konjuh“ kroz omladinsku ligu TK, s 60 organizovanih takmičenja za pionire, predpionire i mlade pionire. Lukavac ima razgranatu mrežu klubova u odbojci, rukometu, košarci i nogometu, koji pokrivaju sve uzrasne kategorije od pionira do juniora. Srebrenik organizuje aktivnosti u OFK „Gradina“, FK „Špionica 1953“ i OK „Srebrenik“, obuhvatajući predpionire, pionire, kadete i juniore, a omladinske selekcije su redovno nagrađivane. Ovi podaci pokazuju da masovnost sporta u Tuzlanskom kantonu nije ravnomjerno raspoređena. Karate i fudbal vode po broju mladih učesnika, dok ostali sportovi imaju značajnu, ali manju zastupljenost. Problem manjih sredina i nerazvijenih infrastrukturnih kapaciteta zahtijeva dodatnu podršku i ulaganja kako bi sport bio dostupniji svim mladima, a omladinske selekcije imale jednake mogućnosti za razvoj i takmičenje.

### *7.2 Primjeri dobre prakse na području TK u radu sa omladinskim uzrasnim kategorijama*

Odbojkaški klub **Bosna Kalesija**, osnovan 1993. godine, predstavlja primjer kontinuiranog i uspješnog rada sa omladinskim uzrasnim kategorijama. Klub se od osnivanja takmiči u svim kategorijama koje organizuje Odbojkaški savez Bosne i Hercegovine, a u 2025. godini seniori su ušli u Premijer ligu BiH, iako su na kraju sezone ispali, trenutno se takmiče u Superligi BiH i zauzimaju treće mjesto. Posebno impresivni rezultati ostvareni su u omladinskim kategorijama. Takmičenja u mlađim kategorijama odvijaju se po turnirskom sistemu – regionalno, federalno i državno prvenstvo. Na regionalnim takmičenjima omladinci su ostvarili plasman u sve tri kategorije. Na federalnom nivou postignuti su sljedeći rezultati:

- **Pioniri:** 2. mjesto u FBiH i plasman na državno prvenstvo
- **Kadeti:** 1. mjesto u FBiH i plasman na državno prvenstvo
- **Junior:** 1. mjesto u FBiH i plasman na državno prvenstvo

Na završnici državnog prvenstva ostvareni su izuzetni rezultati:

- **Pioniri:** 3. mjesto u BiH
- **Kadeti:** 2. mjesto u BiH
- **Junior:** 2. mjesto u BiH

Ovi uspjesi su posebno značajni imajući u vidu da Kalesija predstavlja malu sredinu, a klub trenutno ima samo 30 registrovanih takmičara. Dio najmlađih članova nije registrovan zbog troškova registracije, što dodatno ističe značaj postignutih rezultata. Posebno je pohvalno što klub **ne naplaćuje članarinu ni u jednoj kategoriji**, što je rijetkost u radu omladinskih sportskih klubova i omogućava dostupnost odbojke svim zainteresovanim mladim sportistima. Pristup kluba odbojci je otvoren i za sportiste izvan općine te posebno naglašavaju da su ljubitelji odbojke dolazili čak i iz Tuzle, gdje trenutno ne postoji nijedan muški odbojkaški klub. Upravo ovaj princip dostupnosti sporta svima izdvaja Bosnu Kalesija od drugih klubova



Jedan od primjera dobre prakse u radu sa djecom i mladima predstavlja i sportski kamp „Izadimo napolje“, koji ima kontinuitet održavanja od 2017. godine. Organizator kampa je Udruženje građana Škola sporta Silver Kings iz Srebrenika, koje iz godine u godinu unapređuje koncept kampa kroz povećanje broja učesnika, sadržaja i kvaliteta samog programa. Kamp se organizuje u Sportsko-rekreativnom centru Ajdinovići i traje četiri do pet dana. Sam naziv kampa „Izadimo napolje“ ukazuje na njegovu osnovnu ideju – skretanje pažnje na problem sve manjeg kretanja djece i smanjenog boravka na otvorenom prostoru. U vremenu kada je sjedilački način života sve prisutniji među mladim generacijama, ovakve aktivnosti



imaju značajan zdravstveni i društveni značaj jer podstiču fizičku aktivnost, boravak u prirodi i razvijanje zdravih životnih navika. Kamp je u početku bio zamišljen kao košarkaški, ali je vremenom proširen i na druge sportove, prije svega odbojku. Aktivnosti koje se realizuju tokom boravka na kampu nisu isključivo takmičarskog karaktera. Pored sportskih treninga i utakmica, organizuju se i različiti rekreativni i edukativni sadržaji, poput jutarnjeg fitnessa, radionica, muzičkih programa i drugih društvenih aktivnosti, čime se djeci omogućava kvalitetno i sadržajno vrijeme provedeno u prirodnom okruženju. Na kampu učestvuju djeca iz različitih dijelova Bosne i Hercegovine, a u 2025. godini kamp je imao i međunarodni karakter, budući da su među učesnicima bili mladi sportisti iz Hrvatske, Srbije i Mađarske. Povratne informacije učesnika i njihovih trenera su pozitivne, što otvara mogućnost da se u narednim godinama nastavi i dodatno proširi međunarodna saradnja. Organizatori su u posljednje tri godine, pored ljetnog, počeli organizovati i zimske kampove tokom zimskog raspusta, čime su dodatno obogatili ponudu sportskih aktivnosti za djecu i mlade. Vrijeme koje djeca provode na planini, na svježem zraku i u aktivnom okruženju, posebno je dragocjeno imajući u vidu sve izraženiji problem zagađenosti zraka u urbanim sredinama, ali i sve prisutniji nedostatak fizičke aktivnosti među mlađim generacijama. Također, činjenica da kamp okuplja učesnike iz više država ukazuje da ovakve sportske manifestacije mogu imati i širi značaj, jer doprinose promociji Tuzlanskog kantona i Bosne i Hercegovine, kao i razvoju turističke ponude kroz sportski i omladinski turizam. Ovakvi programi predstavljaju kvalitetan primjer kako sportske aktivnosti mogu biti kombinovane sa edukativnim, rekreativnim i društvenim sadržajima, čime se doprinosi cjelovitom razvoju djece i mladih te jačanju sportske kulture od najranijeg uzrasta.

### *7.3 Značaj sporta u prevenciji rizičnih ponašanja- TK FIT*

Redovna tjelesna aktivnost i uključivanje djece i mladih u organizovane sportske aktivnosti imaju višestruku ulogu u očuvanju zdravlja i prevenciji rizičnih ponašanja. Sport nije samo sredstvo za jačanje tijela, već i ključni faktor u oblikovanju emocionalne stabilnosti, socijalnih vještina i životnih navika. Djeca koja redovno učestvuju u sportskim aktivnostima razvijaju bolje samopouzdanje, samodisciplinu i otpornost na stres. Kroz postavljanje ciljeva, učenje pravila i odgovornosti prema obavezama, mladi stječu sposobnost donošenja promišljenih odluka i smanjuje se njihova sklonost rizičnim ponašanjima poput zloupotrebe alkohola, droga, nasilja ili antisocijalnog ponašanja. Fizička aktivnost direktno doprinosi zdravlju organizma, smanjuje rizik od gojaznosti, metaboličkih poremećaja, dijabetesa i kardiovaskularnih bolesti. Istovremeno, sport razvija motoričke sposobnosti, koordinaciju i opću kondiciju, čime se smanjuje vjerovatnost povreda u svakodnevnim situacijama. Socijalne vještine koje se razvijaju kroz timske aktivnosti, kao što su saradnja, komunikacija, poštivanje pravila i osjećaj pripadnosti, posebno su važne u prevenciji



socijalnih rizika i izolacije. U manjim sredinama, gdje je dostupnost organizovanih aktivnosti ograničena, sport pruža sigurno i strukturirano okruženje za razvoj pozitivnih socijalnih kompetencija i smanjenje rizičnih ponašanja. Kroz sport, djeca također uče odgovornost, planiranje i organizaciju navike koje se prenose i na druge aspekte života. Kontinuirana uključenost u sportske aktivnosti pomaže u oblikovanju zdravih životnih stilova, a kombinacija fizičkog, psihološkog i socijalnog razvoja čini sport jednim od najefikasnijih preventivnih alata u očuvanju zdravlja mladih i smanjenju njihovog izlaganja rizičnim situacijama.

Jedan od primjera kako se ova preventivna uloga sporta može sistematski primijeniti u praksi je projekt **TKFIT – praćenje tjelesnog stanja djece na Tuzlanskom kantonu**. TKFIT predstavlja strukturirani i naučno utemeljen program čiji je cilj sistematsko praćenje fizičkog i motoričkog razvoja učenika, unapređenje nastave tjelesnog odgoja i omogućavanje pravovremenih preventivnih mjera u školama i širem zdravstvenom sistemu.

**Projekat je započet u novembru 2025. godine, nakon odobrenja sredstava od Vlade Tuzlanskog kantona.** Prva faza bila je posvećena izradi web aplikacije ([www.tkfit.ba](http://www.tkfit.ba)) za unos, praćenje i prikaz rezultata testiranja po gradovima i općinama. Ova aplikacija omogućava nastavnicima, školama i roditeljima da prate razvoj učenika, uoče potencijalne rizike i pravovremeno djeluju u skladu sa stvarnim potrebama djece. Prva faza je uspješno završena, a aplikacija je sada funkcionalna i dostupna za svakodnevno korištenje. U drugoj fazi projekta testiranje se provodi u pet odabranih eksperimentalnih škola. Svrha ove faze je provjera funkcionalnosti aplikacije i zahtjevnosti testova za nastavnike tjelesnog i zdravstvenog odgoja. Podaci prikupljeni u ovoj fazi služe za optimizaciju metodologije, testova i same aplikacije. Treća faza predviđa testiranje svih učenika od 5. do 9. razreda u osnovnim školama TK u školskoj 2026/2027. godini, čime će se osigurati sveobuhvatna procjena fizičkog i motoričkog razvoja djece na kantonalnom nivou. TKFIT prati fizički razvoj djece kroz somatska mjerenja, uključujući tjelesnu visinu, težinu i debljinu kožnog nabora na tricepsu, te izračunava indeks tjelesne mase (BMI). Na taj način učenici se kategorizuju kao pothranjeni, sa normalnom težinom, prekomjernom težinom ili gojazni. Praćenje motoričkih sposobnosti obuhvata aerobni kapacitet, mišićnu snagu, izdržljivost, fleksibilnost, brzinu, eksplozivnu snagu i koordinaciju. Redovno praćenje ovih parametara omogućava rano prepoznavanje zdravstvenih rizika i pravovremenu intervenciju, što je ključni faktor u prevenciji rizičnih ponašanja.

Poseban značaj TKFIT-a ogleda se u njegovoj preventivnoj i edukativnoj funkciji. Sistem omogućava saradnju nastavnika i ljekara, posebno kada su u pitanju učenici sa hroničnim ili akutnim zdravstvenim problemima. Ljekari na osnovu podataka iz TKFIT-a mogu preporučiti prilagođene vježbe, kreirati individualne programe fizičkih aktivnosti i davati savjete o ishrani ili zdravstvenim ograničenjima. Umjesto opravdanja za izostanke sa nastave, učenici dobijaju prilagođene aktivnosti koje omogućavaju kontinuiranu tjelesnu aktivnost i smanjuju zdravstvene rizike.

Kroz TKFIT, nastavnici dobivaju precizne podatke o fizičkom i motoričkom razvoju učenika, što im omogućava planiranje nastave i aktivnosti u skladu sa stvarnim sposobnostima djece. Roditelji stječu uvid u zdravstveno stanje i razvoj djeteta, što im omogućava da aktivno učestvuju u stvaranju zdravih navika i podrže uključivanje u dodatne motoričke aktivnosti. Program također pruža holistički pristup za stanja poput gojaznosti ili astme, gdje kombinacija škole i zdravstvenog sistema omogućava efektivnu prevenciju i unapređenje zdravlja. Na taj način, TKFIT postaje konkretan primjer kako sport i sistematsko praćenje fizičkog razvoja mogu direktno doprinijeti prevenciji rizičnih ponašanja kod djece. Redovnim praćenjem fizičkog i motoričkog razvoja, pravovremenom intervencijom i individualnim pristupom, projekt omogućava da djeca razvijaju zdrave životne navike, budu fizički aktivna, socijalno integrisana i otpornija na stres i negativne uticaje, čime se dugoročno smanjuje sklonost

rizičnim ponašanjima i jača sveukupno blagostanje mladih.<sup>7</sup> Ovaj projekt predstavlja značajan i sistematski napor Vlade Tuzlanskog kantona da kroz strukturirane i inovativne programe unaprijedi zdravlje djece, poveća njihovu tjelesnu aktivnost i smanji rizik od rizičnih ponašanja.

## **8. Zdravstveni i sigurnosni aspekti sporta**

### *8.1 Zdravstvena zaštita sportista*

Zdravstvena zaštita sportista u Tuzlanskom kantonu uređena je Zakonom o sportu TK, kojim je propisano da se sportskim aktivnostima i takmičenjima može baviti isključivo lice kod kojeg je, na osnovu obavljenog ljekarskog pregleda, utvrđena opća i posebna zdravstvena sposobnost. Zdravstvene preglede sportista obavljaju ovlaštene zdravstvene ustanove, dok sredstva za preglede obezbjeđuju sportske organizacije koje podnose zahtjev za pregled.

U cilju sagledavanja obima ljekarskih pregleda, prikupljeni su podaci od domova zdravlja i sportskih saveza za 2024. i 2025. godinu.

**Dom zdravlja Živinice**, broj pregleda povećan je sa 30 u 2024. na 40 u 2025. godini. U strukturi pregleda došlo je do značajnih promjena: dok su 2024. bili obuhvaćeni isključivo muški sportisti, u 2025. godini evidentirano je i 18 sportistkinja. Povećao se broj profesionalnih sportista sa 4 na 21, dok je broj amatera smanjen sa 26 na 19. Po uzrasnim kategorijama, smanjen je broj pionira (sa 17 na 15), dok su kadeti (sa 11 na 18) i juniori (sa 1 na 6) bilježili porast, dok je broj seniora ostao isti. Dominantni su bili pregledi košarkaša, uz pojavu pregleda odbojkaša i sportista streljaštva u 2025. godini, koji prethodne godine nisu bili evidentirani.

**Dom zdravlja Srebrenik**, broj pregleda smanjen je sa 60 u 2024. na 39 u 2025. godini. Podaci se uglavnom odnose na sportiste amatere mlađih uzrasnih kategorija, uz manji broj profesionalaca, dok su u 2025. evidentirana i 5 pregleda sportista odbojke uzrasta 2010–2015. godišta.

**Dom zdravlja Lukavac**, obim pregleda bio je značajan. U 2024. godini obavljeno je 1.161 pregled sportista amatera, dok je u 2025. godini evidentirano 1.404 pregleda amatera, uz dodatnih 193 pregleda u okviru školskog sporta, što ranije nije bilo evidentirano.

**Dom zdravlja Gračanica** povećao je broj pregleda sa 21 u 2024. na 47 u 2025. godini. U 2025. godini evidentirano je 9 muških i 38 ženskih sportista, pri čemu su odbojkaši i dalje dominirali (36 pregleda), dok su fudbaleri imali manji broj pregleda (3).

**Dom zdravlja Tuzla** obavio je 2.655 sistematskih pregleda sportista u 2024., a 3.106 u 2025. godini, što predstavlja povećanje od 451 pregleda. Prema dopisu ustanove, na godišnjem nivou realizuje se više od 65.000 ljekarskih i fizioterapeutskih usluga, što potvrđuje značaj zdravstvene zaštite sportista i dostupnost ovih usluga.

**Domu zdravlja Kalesija**, osnovni ljekarski pregled u 2025. godini obavilo je ukupno 800 sportista amatera iz 19 klubova, od kojih je 195 pregleda obavljeno za omladinske uzrasne kategorije.

Prema podacima sportskih saveza:

<sup>7</sup> Univerzitet u Tuzli, Fakultet za tjelesni odgoj i sport

- **Nogometni savez TK:** ukupno 6.491 registrovan igrač, uključujući 102 žene i 303 futsal igrača. Iako klubovi nisu obavezni dostavljati ljekarska uvjerenja, važeći pregled u sportskoj legitimaciji je uvjet za nastup, uz kontrolu delegata.
- **Rukometni savez TK:** od 616 registrovanih rukometaša i rukometašica svi posjeduju važeći ljekarski pregled.
- **Savez sjedeće odbojke RVI i invalidnih lica:** ukupno 119 pregleda za 119 sportista.
- **Košarkaški savez TK:** obavljeno ukupno 815 pregleda,
- **Karate savez TK:** samo dva kluba dostavila potpune podatke, ukupno 276 takmičara sa ljekarskim pregledom.<sup>8</sup>

**Iako su podaci iz 2025. godine djelimično nepotpuni i nisu obuhvatili sve sportove i sportske saveze primjerice atletiku, pojedine borilačke sportove zbog neslaganja unutar saveza i sportske discipline za koje nije formiran savez moguće je sagledati opseg zdravstvene zaštite i broj aktivnih sportista u Tuzlanskom kantonu.**

**S obzirom na moguće preklapanje podataka mnogi sportisti koji su obavili ljekarske preglede u domovima zdravlja su također registrovani u savezima – te na to da podaci za određene sportove i saveze nisu dostupni, ukupni broj aktivnih sportista u Tuzlanskom kantonu u 2025. godini može se procijeniti na otprilike 7.500 do 8.500 sportista, uključujući sve uzrasne i takmičarske kategorije.**

Ministarstvo je, kroz javni poziv za sportske organizacije, omogućilo da troškovi ljekarskih pregleda budu prihvatljivi u projektima vrhunskog, kvalitetnog i omladinskog sporta, uključujući sportiste sa invaliditetom. Iako su ovo korisni koraci za podršku sportistima, analiza utroška sredstava pokazala je da ovu mogućnost gotovo nijedna sportska organizacija praktično nije koristila.

## *8.2 Uloga pružanja i poznavanja prve pomoć i preventivnih mjera*

Sport, iako izuzetno važan za razvoj djece i mladih, nosi sa sobom određene rizike. Rizična ponašanja i nesreće u sportu mogu uključivati uganuća, lomove, povrede glave, pa čak i ozbiljnije zdravstvene komplikacije poput srčanih udara. Nedovoljna pripremljenost za ovakve situacije može imati teške posljedice po zdravlje i sigurnost učesnika, a svjedoci smo i sve češćih tragičnih ishoda na terenima. Zbog toga je preventivna uloga edukacije i osposobljavanja osoba koje rade u sportu od izuzetnog značaja kako bi mogle pravovremeno reagovati i smanjiti potencijalnu štetu.

**Po prvi put u 2025. godini, Fakultet za tjelesni odgoj i sport Univerziteta u Tuzli, u saradnji sa Crvenim križem Tuzlanskog kantona, organizovao je besplatnu obuku za sportske radnike i nastavnike tjelesnog i zdravstvenog odgoja. Cilj je bio osposobiti što veći broj osoba za pružanje prve pomoći u neželjenim situacijama, čime se direktno unapređuje sigurnost djece i mladih u sportu. Ova inicijativa pokazuje jasnu opredijeljenost Vlade Tuzlanskog kantona i Ministarstva kulture, sporta i mladih da kontinuirano podržavaju projekte koji unapređuju zdravstvenu zaštitu sportista i osnažuju zajednicu kroz preventivne mjere.**

Zainteresovanost za obuku bila je velika, a prisustvovalo je 30 učesnika, što potvrđuje potrebu za kontinuiranim edukacijama i osposobljavanjem sportskih radnika i nastavnika. Osposobljavanjem za pružanje prve pomoći stvara se sigurnije okruženje za sve učesnike, smanjuje rizik od nesreća i povreda, te se doprinosi jačanju kapaciteta zajednice da adekvatno reaguje u situacijama kada dođe do nesreća ili hitnih zdravstvenih stanja. **Ovaj projekat, koji**

<sup>8</sup> Ministarstvo zdravstva Tuzlanskog kantona

je po prvi put realizovan 2025. godine, predstavlja značajan napor Vlade TK i Ministarstva da kroz konkretne preventivne mjere unaprijede zdravlje, sigurnost i odgovorno ponašanje svih koji učestvuju u sportskim aktivnostima. Osposobljavanjem sportskih radnika i nastavnika za pružanje prve pomoći ne jača se samo sigurnost djece i mladih, već se i promoviše kultura prevencije, odgovornosti i profesionalnog pristupa u sportu.

### *8.3 Antidoping kontrole*

Sukladno Zakonu o sportu, sportistima i svim učesnicima u sportu zabranjeno je uzimanje nedozvoljenih stimulativnih sredstava, kao i davanje ili podsticanje njihovog korištenja, u skladu sa pravilima Svjetske antidoping organizacije. U cilju sagledavanja stanja i planiranja preventivnih mjera, Ministarstvo se obratilo Agenciji za antidoping i kontrolu BiH sa zahtjevom za dostavu podataka. Agencija je dostavila opšti odgovor, navodeći da ne raspoložu podacima pojedinačno po kantonima, već samo na nivou cijele Bosne i Hercegovine. Prema njihovim informacijama, u 2025. godini je obavljeno 326 kontrola, zabilježena su 3 kršenja antidoping pravila, te je održano više od 30 edukacija.

Iako su dostavljeni podaci korisni za opću sliku, nedostatak detaljnijih informacija otežava preciznu analizu na kantonalnom nivou. Upravo iz tog razloga smatramo da bi bilo važno da se Ministarstvo, u saradnji sa sportskim savezima, aktivnije uključi u preventivne aktivnosti.<sup>9</sup>

## **9. Postignuća i pozitivni primjeri**

### *9.1 Najznačajniji sportski rezultati klubova i pojedinaca*

U mjesecu januaru održana je manifestacija „Izbor sportiste Tuzlanskog kantona za 2025. godinu“, koju organizuju Sportski savez Tuzlanskog kantona i Sportski savez osoba sa invaliditetom Tuzlanskog kantona, pod pokroviteljstvom Ministarstva za kulturu, sport i mlade Tuzlanskog kantona. Ova manifestacija predstavlja značajan događaj u kantonalnom sportu, jer kroz nju bivaju prepoznati i nagrađeni najuspješniji sportisti, treneri i ekipe, a dodijeljena priznanja prate kontinuitet nagrađivanja najistaknutijih sportista u prethodnim godinama, čime se potvrđuje njihova dugogodišnja posvećenost i doprinos razvoju sporta u Tuzlanskom kantonu. Manifestacija je po 32. put okupila najbolje sportiste, sportske kolektive, trenere i sportske radnike iz cijelog kantona. Centralna priznanja pripala su atletičaru Bakiru Musiću članu AK Sloboda Tehnograd i karatistkinji Stefani Krešić članici Karate kluba DO, koji su svojim rezultatima obilježili sportsku godinu na domaćoj i međunarodnoj sceni. Stefani Krešić je šesti puta za redom osvojila ovo laskavo priznanje. U nastavku donosimo pregled ostalih nagrađenih

#### **Perspektivni sportisti:**

- Nikola Pavljašević (AK „Sloboda Tehnograd“ Tuzla)
- Haris Dedić (Kungfu wushu sanda klub „Lei Tai“ Tuzla)
- Benjamin Demirović (TK „Sloboda“ Tuzla)

<sup>9</sup> Agencija za antidoping i kontrolu BiH

- Hamza Hamzić (KBS Tuzla)
- Berina Brković (KK „Winner“ Tuzla)

**Najuspješniji kadeti i kadetkinje:**

- Alem Elezović
- Nejra Konaković
- Ema Čabrić
- Šejla Ašćić
- Kenan Ahmetović
- Ena Bećirović
- Ado Mešić
- Nada Đulović

**Najuspješniji junior/juniorka:**

- Melika Mujkić
- Isi Zildžić
- Bakir Mešalić
- Amer Bećirović
- Nedim Osmanbegović
- Zana Kunosić

**Najuspješni treneri u 2025. godini:**

- Admir Derzić
- Mirsada Suljkanović-Selimović
- Kada Delić-Selimović
- Loren Šarić
- Anel Hrustić
- Mesud Selimović

**Najuspješnije sportske ekipe:**



- Rukometni klub „Konjuh“ Živinice
- Košarkaški klub RMU Banovići
- Atletski klub „Sloboda Tehnograd“ Tuzla

**Najuspješni seniori/seniorke:**

- Mirza Modrić
- Muris Đug
- Dejan Ivanović
- Boris Balta

**Nagrade za sportiste osobe sa invaliditetom:**

- Perspektivni sportista: **Ensar Duraković** (SKOSI „Živinice“)



- **Najuspješnije sportske ekipe:**
  - SKISO „Sinovi Bosne“ Lukavac
  - Klub invalidskog košarkaša „Zmaj“ Gradačac
  - SKOSI „Tuzla“
- **Najuspješniji treneri:**
  - Fahrudin Muharemović (SKISO „Sinovi Bosne“)
  - Bećir Džinić (SKOSI „Živinice“)
  - Ševal Malčinović (Savez sporta osoba sa invaliditetom TK)
- **Najuspješni seniori:**
  - Jozo Kaldrmdžić (SKOSI „Živinice“)
  - Senad Mešić (KIK „Zmaj“ Gradačac)
  - Zinaida Bašić (SKOSI „Tuzla“)
- **Najuspješniji sportisti:**
  - Safet Jagodić (SKOSI „Živinice“)
  - Elvis Šerifović (SKISO „Sinovi Bosne“)<sup>10</sup>


## 9.2 Sportisti kao najbolji ambasadori Bosne i Hercegovine i Tuzlanskog kantona

Tuzlanski kanton je prepoznat po brojnim talentovanim sportistima čiji uspjesi ne poznaju granice, kako na domaćoj, tako i na međunarodnoj sceni. Nagrađivanje sportista diplomatskim pasošima predstavlja poseban vid priznanja za njihov trud, predanost i izvanredne rezultate, ali i za promociju Bosne i Hercegovine u svijetu kroz sport. Ovi sportisti postaju pravi ambasadori naše zemlje, simbol izvrsnosti i inspiracija mladim generacijama koje žele da se bave sportom.

U 2025. godini nekoliko istaknutih sportista sa područja Tuzlanskog kantona dobilo je diplomatski pasoš u znak priznanja za svoje postignuće i doprinos međunarodnoj afirmaciji Bosne i Hercegovine, neki od njih su:

- **Mesud Selimović (kickboxing)** – član KBV “Flek Tom-Cat” Tuzla, višestruki svjetski medalista. Dobio je diplomatski pasoš kao priznanje za izvanredne rezultate na međunarodnoj sceni i kontinuiranu promociju BiH kroz sport.
- **Razija Mujanović (košarka)** – legendarna bh. košarkašica, diplomatski pasoš je dobila za dugogodišnje izuzetne sportske rezultate i ulogu u promociji Bosne i Hercegovine u svijetu košarke.
- **Kada Delić Selimović (atletika)** – legendarna trenerica iz Tuzle, diplomatski pasoš je dobila za dugogodišnje izuzetne sportske rezultate i ulogu u promociji atletike i Bosne i Hercegovine.
- **Bakir Musić (atletika)** – mladi atletičar iz Kalesije, nagrađen diplomatskim pasošem zbog odličnih rezultata na međunarodnim atletskim takmičenjima.

Ovi sportisti svojim uspjesima doprinose ne samo razvoju sporta u kantonu, već i jačanju ugleda Bosne i Hercegovine u međunarodnoj sportskoj zajednici. Njihova posvećenost i postignuća služe kao inspiracija mladima, motivišući nove generacije da se bave sportom i teže izvrsnosti, te pokazuju koliko su ulaganja u



<sup>10</sup> Sportski savez Tuzlanskog kantona

sport i kontinuirana podrška sportistima značajni za promociju zemlje i razvoj sporta u lokalnim zajednicama. Tuzlanski kanton kontinuirano podržava uspješne sportiste kroz sistem stipendiranja, pri čemu se sredstva iz godine u godinu povećavaju, kako bi se nagradila njihova predanost, trud i postignuti rezultati. Ovim pristupom pokazujemo da su nam sportisti i njihovi uspjesi od posebnog značaja, te da je cilj kantonalne politike u sportu pružiti adekvatnu podršku talentima i perspektivnim sportistima, omogućavajući im bolje uslove za trening, takmičenja i međunarodnu afirmaciju. Dugogodišnja praksa stipendiranja potvrđuje da Tuzlanski kanton ulaže u razvoj sporta i prepoznaje vrijednost ulaganja u pojedince koji svojim rezultatima doprinose promociji sporta i ugleda kantona i države. Tuzlanski kanton kontinuirano podržava perspektivne sportiste i njihove trenere, prepoznajući značaj njihovog zajedničkog rada i rezultata. Tako je kroz sistem stipendiranja podržan Bakir Musić, mladi atletičar iz Kalesije, čiji trud i posvećenost sportu pokazuju veliki potencijal, ali i njegova trenerica Kada Delić, koja svojim radom i stručnim vođenjem doprinosi njegovim postignućima. Stipendija je dodijeljena kako bi se pratilo njihovo angažovanje i rezultati, te kako bi kanton pružio adekvatnu podršku sportisti i trenerici koji svojim radom grade uspjehe u atletici. Ovakav vid podrške potvrđuje kontinuitet ulaganja u razvoj sporta i važnost nagrađivanja predanog rada i postignuća, a Bakir Musić svojim rezultatima ističe se kao istinska nada atletike Tuzlanskog kantona.

## **10. Institucionalna finansijska podrška razvoju sporta u 2025. godini**

### *10.1 Finansijska podrška Ministarstva*

R.B. (1)	Opis (2)	Plan 2025. (3)	Ostvareno 2025. (4)
1.	Ugovorene i druge posebne usluge	30.000,00	3.819,75
2.	Tekući transferi pojedincima	150.000,00	149.550,00
3.	Tekući transferi neprofitnim organizacijama	1.171.000,00	1.156.506,00
4.	Subvencije javnim preduzećima	100.000,00	100.000,00
5.	Kapitalni grantovi drugim nivoima vlasti i fondovima	409.000,00	409.000,00
6.	Kapitalni transfer neprofitnim organizacijama	200.000,00	189.780,00
7.	Kapitalni transferi javnim preduzećima	120.000,00	120.000,00
5.	Nabavka stalnih sredstava u obliku prava	20.000,00	0
<b>UKUPNO</b>		<b>2.200.000,00</b>	<b>2.128.655,75</b>

*Tabela 2. Pregled ukupno realizovanih sredstava za tjelesnu kulturu i sport za 2025. godinu.*

Ministarstvo i Vlada Tuzlanskog kantona snažno su opredijeljeni razvoju sporta, a aktivnosti poput finansijske podrške sportskim organizacijama, edukacijama, osposobljavanju sportskih radnika i organizovanju prijema samo su mali, ali konkretni načini na koje podržavamo sport i institucionalno održavamo njegov razvoj. Uvijek smo otvoreni za saradnju sa svim relevantnim subjektima, a Vlada Tuzlanskog kantona kontinuirano potpomaže sport i sa drugih pozicija kroz finansiranje, praćenje i podršku različitim projektima. U proteklom periodu Ministarstvo je provelo tri poziva u oblasti sporta, a u nastavku ćemo predstaviti detaljniju analizu, poređenje sa prethodnim godinama i prikaz rezultata kroz grafikone, kako bi se sagledao stvarni napredak i stanje sporta na području Tuzlanskog kantona.

U okviru programa „Finansiranje i podrška razvoju sporta,“ Ministarstvo je u 2025. godini realizovalo tri javna poziva namijenjena razvoju sporta kao djelatnosti od javnog interesa na području Kantona i to:

1. Javni poziv za sufinansiranje programa/projekata sportskih organizacija u oblasti tjelesne kulture i sporta za 2025. godinu,

2. Javni poziv za dodjelu sportskih stipendija za sportiste i trenere za 2025. godinu,
3. Javni poziv za sufinansiranje projekata rekonstrukcije i opremanja sportskih objekata za 2025. godinu.

### 1. Javni poziv za sufinansiranje programa/projekata sportskih organizacija u oblasti tjelesne kulture i sporta za 2025. godinu

Kada je u pitanju Javni poziv za sufinansiranje programa/projekata sportskih organizacija u oblasti tjelesne kulture i sporta za 2025. godinu u okviru vrhunskog i kvalitetnog sporta, uključujući sport lica sa invaliditetom, broj korisnika je porastao sa 45 u 2023. godini na 58 u 2025. godini, što predstavlja povećanje od 13 korisnika odnosno 28,9%. U poređenju sa 2024. godinom, zabilježen je umjeren, ali stabilan rast od 9,4%, što ukazuje na kontinuiranu podršku ovom segmentu sporta.


Program „Sport za sve“ bilježi oscilacije u 2024. godini, ali snažan oporavak u 2025. godini. Broj korisnika povećan je sa 16 u 2023. na 21 u 2025. godini (+31,3%), dok je u odnosu na 2024. godinu rast iznosio čak 50%. Ovi podaci ukazuju na pojačano interesovanje i širi društveni obuhvat rekreativnih i inkluzivnih sportskih aktivnosti.

Najizraženiji rast ostvaren je u oblasti omladinskih uzrasnih kategorija. Broj korisnika povećan je sa 15 u 2023. godini na 123 u 2025. godini, što predstavlja povećanje od čak 720%. U odnosu na 2024. godinu, rast iznosi 161,7%. Ovakav trend jasno potvrđuje snažno usmjerenje Ministarstva ka razvoju omladinskog sporta i dugoročnom ulaganju u bazu budućih sportista.

Broj korisnika za sportske manifestacije takode bilježi kontinuiran rast – sa 29 u 2023. na 60 u 2025. godini (+106,9%). U poređenju sa 2024. godinom, povećanje iznosi 30,4%, što ukazuje na povećan broj organizovanih sportskih događaja i jačanje sportske ponude na području Kantona.

U segmentu djelatnosti sportskih saveza zabilježen je rast sa 1 korisnika u 2023. godini na 6 u 2025. godini, što procentualno predstavlja značajno povećanje, iako se radi o manjem apsolutnom broju. Ovaj trend ukazuje na jačanje institucionalne podrške radu sportskih saveza.

Sufinansiranje trenažnog procesa kroz javna preduzeća (JP) i javne ustanove (JU) pokazuje blagi, ali pozitivan trend u 2025. godini, nakon oscilacija u prethodnim godinama, što ukazuje na postepeno uključivanje ovih subjekata u sistem finansiranja sporta.




Grafikon broj 1.: Prikaz utroška sredstava po Javnom pozivu za sportske organizacije kroz godine

Ukupan broj projekata finansiranih kroz Javni poziv za sport povećan je sa 109 u 2023. godini na 273 u 2025. godini. To predstavlja rast od 150,5% u odnosu na 2023. godinu i 65,5% u odnosu na 2024. godinu, čime se potvrđuje značajno proširenje obuhvata korisnika i projekata u 2025. godini.

## 2. Javni poziv za dodjelu sportskih stipendija za sportiste i trenere za 2025. godinu

Stipendiranje sportista i trenera predstavlja jedan od najvažnijih instrumenata podrške u razvoju sporta. Pojedinci koji postižu izvanredne rezultate, ulažu trud i posvećenost, često postaju uzori drugim mladim sportistima, motivišu ih da se razvijaju i pridržavaju visokih standarda discipline i rada. Prepoznavanje i nagrađivanje njihovih postignuća ne samo da afirmiše talenat, već šalje jasnu poruku da se uspjeh cijeni i da je ulaganje u sportiste i trenere strateški prioritet za razvoj sporta na svim nivoima.

U odnosu na 2023. godinu, broj korisnika u 2025. godini povećan je za gotovo 95%, što jasno pokazuje da se sistem finansiranja sporta širi i jača. Posebno je izražen rast u segmentu sportskih stipendija (+122,4%) i školskih sportskih takmičenja (+82,6%), dok ukupni obuhvat korisnika potvrđuje stabilan i snažan trend. Podaci predstavljaju opredjeljenje Ministarstva da se dobri rezultati nagrađuju, a talenti prepoznaju i podrže. Svaki rast u broju stipendija, takmičenja i projekata znači da se stvara šira baza mladih sportista, da se ulaže u njihov razvoj i da se gradi temelj za buduće sportske uspjehe.



Grafikon broj 2.: Pregled izdavanja za Javni poziv za sportske stipendije sportistima i trenerima po godinama.

Kontinuirano povećanje broja korisnika pokazuje da se ulaže u kvalitetan rad sportista i trenera, ali i u inkluzivne programe koji obuhvataju djecu, mlade i osobe sa invaliditetom. Time se ne samo nagrađuju postignuća, već se i širi društveni obuhvat sporta, jača sportska infrastruktura i stvara kultura u kojoj se uspjeh vrednuje, a trud dobija zasluženu podršku.


## 3. Javni poziv za sportsku infrastrukturu

Broj projekata i korisnika u oblasti sportske infrastrukture povećan je sa 8 u 2023. na 12 u 2025. godini, što predstavlja rast od 50%. U odnosu na 2024. godinu zabilježen je blagi pad broja projekata (-7,7%), što može ukazivati na konsolidaciju većih i finansijski zahtjevnijih infrastrukturnih projekata. Kvalitetna infrastruktura nije važna samo za sportiste, već i za zajednicu u cjelini. Modernizovani stadioni, dvorane i sportski tereni omogućavaju organizaciju većeg broja sportskih manifestacija, turnira i rekreativnih programa, što pozitivno utiče na promociju sporta, zdravih stilova života i jačanje lokalnog identiteta. Ulaganja u infrastrukturu

direktno doprinose i razvoju sportske ekonomije, kroz održavanje objekata, organizaciju događaja i privlačenje posjetilaca i takmičara iz drugih sredina.

Grad Tuzla, unatoč velikom broju sportskih entuzijasta i talentiranih sportista, još uvijek se suočava s izazovima kada je u pitanju adekvatna sportska infrastruktura. Jedan od najvećih objekata u gradu, JP SKPC "Mejdan", izgrađen je davne 1987. godine, a od tada nisu realizovane značajnije investicije u nove sportske dvorane i objekte za treninge. Iako se ulagalo u održavanje postojećih kapaciteta, nedostatak modernizacije i novih objekata i dalje predstavlja veliki izazov za razvoj sporta u Tuzli. Uprkos tome, JP SKPC "Mejdan" aktivno učestvuje na javnim pozivima Ministarstva za sport i ostvaruje značajna sredstva, zahvaljujući kojima su realizovane brojne rekonstrukcije i nabavke sportske opreme. Slično, Sportska dvorana u Kalesiji izgrađena je, ali unutrašnji radovi još nisu u potpunosti završeni. Iako dvorana ima imponzantne dimenzije i velik kapacitet, trenutno se suočava s infrastrukturnim nedostacima, uključujući prokišnjavanje, što naglašava potrebu za dodatnim ulaganjima kako bi objekat postao funkcionalan i siguran za korišćenje. Potencijal ove dvorane je veliki, jer bi mogla poslužiti kao značajna sportska i društvena tačka u regionu, sa kapacitetom za veliki broj posetilaca. Također, i JU "Sportsko kulturni centar Banovići" redovno učestvuje na javnim pozivima našeg Ministarstva. U 2025. godini dobili su sredstva za rekonstrukciju vanjske fasade i utopljanje sportske dvorane, što predstavlja još jednu u nizu finansijskih podrški Ministarstva za unapređenje sportske infrastrukture. Dio sredstava našeg ministarstva omogućio je i općini Kladanj otvaranje nove sportske dvorane, dok je u 2025. godini općina dobila sredstva za sanaciju i rekonstrukciju sportskog poligona kod OŠ Tuholj. Općine Gradačac i Gračanica su, također, dobile sredstva za sanaciju svlačionica u sportskoj dvorani Gradačac, odnosno sanaciju sportske podloge u dvorani Luke Gračanica.

Ovi primjeri jasno pokazuju da je Ministarstvo kontinuirano angažovano u podršci razvoju sportske infrastrukture na području Tuzlanskog kantona, čime se stvara osnova za kvalitetniji i sigurniji rad sportskih klubova i organizacija, te za povećanje dostupnosti sportskih aktivnosti za sve građane.




Grafikon broj 3.: Pregled izvođenja po javnom pozivu za sportsku infrastrukturu po godinama

Efekte do sada urađenih projekata i presjeci stanja sportske infrastrukture na području Tuzlanskog kantona, uključujući rekonstrukciju i adaptaciju sportskih objekata, detaljno su obrazloženi ranije u tekstu. Također, značaj ovih ulaganja je posebno istaknut kroz analizu dostupnosti, funkcionalnosti i kapaciteta objekata, pokazujući koliko je infrastruktura važna za kontinuirani razvoj sporta i postizanje vrhunskih rezultata sportista. Ovi pokazatelji jasno potvrđuju da je ulaganje u sportske objekte prioritet koji direktno utiče na kvalitet sportskih aktivnosti i dugoročni razvoj sporta u Tuzlanskom kantonu.

#### 4. Pojedinačne odluke Ministarstva

Ministarstvo raspolaže i interventnim sredstvima koja se koriste u situacijama kada je potrebno brzo reagovati, a sportske organizacije nisu u mogućnosti unaprijed planirati ili pokriti određene aktivnosti kroz javni poziv. Ova sredstva omogućavaju da se obezbijede odlasci sportista na međunarodna takmičenja, sufinansiraju turniri, manifestacije i sportski događaji od izuzetnog značaja, ili pruži podrška u hitnim slučajevima koji zahtijevaju brzu intervenciju. Korištenje interventnih sredstava je naročito korisno jer omogućava fleksibilnost i pravovremenu podršku sportskim organizacijama, čime se osigurava kontinuitet takmičenja i promocija sporta. Pored toga, u posljednjih nekoliko godina zabilježen je postepeni rast ovih sredstava, što dodatno pokazuje posvećenost Ministarstva jačanju sportskih kolektiva i podršci sportistima, posebno u situacijama kada je brza reakcija od ključne važnosti

U 2025. godini za ove svrhe izdvojeno je **137.413 KM**, što predstavlja povećanje u odnosu na prethodne godine, kada je u 2024. godini za interventne potrebe izdvojeno **108.836 KM**, a u 2023. godini **171.670 KM**. Povećanje sredstava u 2025. pokazuje posvećenost Ministarstva pružanju pravovremene i efikasne podrške sportistima i sportskim organizacijama, posebno u situacijama hitnosti ili kada planiranje kroz javni poziv nije moguće.



Grafikon broj 4.: Pregled izdvojanja sredstava pojedinačnim odlukama Ministarstva po godinama

Pojedinačnim odlukama Ministarstva u 2025. godini podržana je organizacija značajnih međunarodnih i reprezentativnih sportskih događaja. Važno je naglasiti da ranijih godina ovakav vid podrške nije bio realizovan direktno kroz budžet Ministarstva, već su se sredstva za ove namjene uglavnom obezbjeđivala putem tekuće rezerve Vlade Tuzlanskog kantona. Međutim, u 2025. godini po prvi put Ministarstvo je direktno izdvojilo sredstva za ove namjene, čime je napravljen značajan iskorak u sistemskom pristupu podršci velikim sportskim događajima i reprezentativnim nastupima.

U tom kontekstu, Košarkaškom savezu Bosne i Hercegovine odobreno je 30.000,00 KM za organizaciju kvalifikacione utakmice košarkaške reprezentacije Bosne i Hercegovine u tuzlanskoj dvorani Mejdan, odigrane u februaru 2025. godine, čime je Tuzla još jednom bila domaćin važnog međunarodnog sportskog događaja i pružila snažnu podršku reprezentaciji Bosne i Hercegovine. Takođe, Rukometnom savezu Bosne i Hercegovine odobreno je 35.000,00 KM za organizaciju kvalifikacione utakmice rukometne reprezentacije Bosne i Hercegovine, koja je također odigrana u dvorani Mejdan, što dodatno potvrđuje značaj Tuzle i Tuzlanskog kantona kao centra organizacije velikih sportskih manifestacija. Pored toga, Sportskom ribolovnom savezu Bosne i Hercegovine odobrena su sredstva u iznosu od 35.000,00 KM za organizaciju Svjetskog prvenstva u sportskom

ribolovu, čime je pružena podrška realizaciji jednog od najznačajnijih međunarodnih takmičenja u ovoj sportskoj disciplini. Organizacija ovakvih događaja doprinosi promociji sporta, jačanju međunarodne sportske saradnje, ali i promociji Bosne i Hercegovine kao destinacije za održavanje velikih sportskih takmičenja.

### *10.2 Finansijska podrška Ministarstva civilnih poslova BiH*

Podrška razvoju oblasti tjelesne kulture i sporta vrši se iz budžeta različitih nivoa vlasti. Ministarstvo civilnih poslova Bosne i Hercegovine, Federalno ministarstvo kulture i sporta, Ministarstvo porodice, omladine i sporta Republike Srpske, Odjeljenje za privredni razvoj, sport i kulturu Brčko distrikta BiH, kantonalna ministarstva nadležna za oblast sporta te jedinice lokalne samouprave u BiH su institucije zadužene za dodjelu budžetskih sredstava za razvoj sporta u Bosni i Hercegovini. Ove institucije definišu i implementiraju programe podrške razvoju sporta, a osnovne informacije o programu poticaja Ministarstva civilnih poslova BiH, Federalnog ministarstva kulture i sporta, Ministarstva Tuzlanskog kantona i lokalnih zajednica na području Tuzlanskog kantona u 2025. godini dajemo u nastavku.

Ministarstvo civilnih poslova Bosne i Hercegovine sredstva za sport dodjeljuje na osnovu kriterija koje donosi za svaku godinu. Na osnovu Odluke o kriterijima za raspored sredstava namijenjenih za tekući grant „Sufinansiranje sportskih manifestacija“ na osnovu kojih je raspisan Javni poziv za dodjelu sredstava namijenjenih za tekući grant “Sufinansiranje sportskih manifestacija”. U 2025. godini Ministarstvo civilnih poslova Bosne i Hercegovine je putem javnog poziva za dodjelu sredstava iz tekućeg granta „Sufinansiranje sportskih manifestacija“ podržalo realizaciju sportskih projekata i manifestacija širom Bosne i Hercegovine. Ukupan iznos sredstava za ovu namjenu iznosio je 1.342.000,00 KM, a sredstva su dodijeljena sportskim savezima, sportskim organizacijama i klubovima koji organizuju ili učestvuju na međunarodnim sportskim manifestacijama. Sa područja Tuzlanskog kantona podršku su ostvarile i pojedine sportske organizacije i klubovi koji su organizovali ili učestvovali na međunarodnim sportskim takmičenjima i manifestacijama. Ukupan iznos sredstava dodijeljen organizacijama iz Tuzlanskog kantona iznosio je približno 17.500,00 KM, što predstavlja oko 1,3 % ukupnih sredstava dodijeljenih kroz ovaj program.

Organizacija	Naziv projekta / manifestacije	Odobrena sredstva (KM)
Klub borilačkih sportova Tuzla	Međunarodni karate turnir Tuzla Open	5.000
Atletski klub Sloboda Tuzla	Međunarodni atletski miting „Tuzla 2025“	4.000
Stonoteniski klub Kreka Tuzla	Učešće na međunarodnim stonoteniskim turnirima	3.000
Karate klub Winner Tuzla	Organizacija međunarodnog karate takmičenja	3.000
Košarkaški klub Gradina Srebrenik	Učešće na međunarodnom košarkaškom turniru	2.500

*Tabela 3. Pregled dodijeljenih sredstava MCP BiH sportskim organizacijama sa područja TK.*

Iako je kroz ovaj program podržano i nekoliko sportskih organizacija sa područja Tuzlanski kanton, ukupna sredstva koja su dodijeljena za projekte iz ovog kantona su relativno skromna u odnosu na veličinu kantona, broj sportskih organizacija i razvijenost sportskog sistema. S obzirom na činjenicu da Tuzlanski kanton predstavlja jedan od najvećih i najnaseljenijih kantona u Federaciji Bosne i Hercegovine, sa velikim brojem sportskih klubova, sportista i sportskih manifestacija, može se zaključiti da je obim sredstava koji je kroz ovaj program dodijeljen organizacijama sa ovog područja nedovoljan za značajniji doprinos razvoju

sporta i podršku međunarodnim sportskim aktivnostima. Iz tog razloga postoji potreba da se u narednom periodu osigura veće učešće i ravnomjernija raspodjela sredstava za sportske organizacije iz Tuzlanskog kantona, kako bi se omogućila adekvatnija podrška razvoju sporta i međunarodnoj afirmaciji sportista i sportskih kolektiva sa ovog područja.<sup>11</sup>

### *10.3 Finansijska podrška Federalnog ministarstva kulture i sporta*

U 2025. godini Federalno ministarstvo kulture i sporta je putem javnog poziva za finansiranje i sufinansiranje projekata u oblasti sportske infrastrukture dodijelilo sredstva jedinicama lokalne samouprave širom Federacije Bosne i Hercegovine. Ukupan iznos sredstava izdvojenih za ovu namjenu iznosio je 16.000.000,00 KM, a sredstva su bila usmjerena na projekte izgradnje, rekonstrukcije, adaptacije i opremanja sportskih objekata. Sa područja Tuzlanskog kantona sredstva su odobrena za projekte u više gradova i općina, prvenstveno za unapređenje sportske infrastrukture, rekonstrukciju postojećih sportskih objekata, izgradnju novih sportskih terena te stvaranje boljih uslova za bavljenje sportom i rekreativnim aktivnostima.

Ukupno dodijeljena sredstva za projekte sa područja Tuzlanskog kantona iznosila su 2.720.362,12 KM, što predstavlja približno 17 % ukupnih sredstava dodijeljenih na nivou Federacije Bosne i Hercegovine kroz ovaj program. Realizacija navedenih projekata doprinosi poboljšanju uslova za trening i takmičenja sportista, razvoju omladinskog i rekreativnog sporta, te unapređenju sportske infrastrukture u lokalnim zajednicama, što dugoročno ima značajan uticaj na povećanje dostupnosti sportskih sadržaja i kvalitet organizacije sportskih aktivnosti.

<b>Grad / Općina</b>	<b>Naziv projekta</b>	<b>Odobrena sredstva (KM)</b>	<b>Učešće u ukupnim sredstvima (%)</b>
<b>Grad Tuzla</b>	Sanacija i modernizacija atletske staze na Gradskom stadionu Tušanj	<b>656.963,00</b>	<b>24,15 %</b>
<b>Grad Tuzla</b>	Sanacija sportskih podova u maloj dvorani, trening sali i fitness centru SKPC „Mejdan“	<b>594.464,00</b>	<b>21,86 %</b>
<b>Općina Kalesija</b>	Gradska sportska dvorana – mašinska faza	<b>300.000,00</b>	<b>11,03 %</b>
<b>Grad Srebrenik</b>	Nabavka i ugradnja umjetne trave za fudbalski teren	<b>125.102,25</b>	<b>4,60 %</b>
<b>Grad Srebrenik</b>	Izgradnja teniskih terena Srebrenik 2025	<b>123.145,50</b>	<b>4,53 %</b>
<b>Grad Srebrenik</b>	Padel teniski tereni 2025	<b>120.204,60</b>	<b>4,42 %</b>
<b>Grad Gradačac</b>	Sanacija i adaptacija unutrašnjih prostorija sportske dvorane „Skenderija“	<b>100.000,00</b>	<b>3,68 %</b>
<b>Grad Gradačac</b>	Centar za spašavanje i edukaciju ljudi – Ronilački klub Vidara	<b>125.716,38</b>	<b>4,62 %</b>
<b>Općina Čelić</b>	Rekonstrukcija stadiona Čelić i pomoćnih prostorija za školu fudbala	<b>191.550,75</b>	<b>7,04 %</b>
<b>Općina Banovići</b>	Izgradnja sportsko-rekreativnih terena	<b>183.215,64</b>	<b>6,73 %</b>
<b>Grad Lukavac</b>	Izgradnja košarkaškog poligona u naselju Lukavac Grad	<b>200.000,00</b>	<b>7,35 %</b>
<b>UKUPNO – Tuzlanski kanton 2.720.362,12 KM</b>			

*Tabela 4. Pregled dodijeljenih sredstava FMKS gradovima i općinama sa područja TK.*

<sup>11</sup> Ministarstvo civilnih poslova BiH

Ulaganja u izgradnju, rekonstrukciju i adaptaciju sportskih objekata doprinose stvaranju kvalitetnijih uslova za trening i takmičenja sportista, ali i omogućavaju veću dostupnost sportskih sadržaja građanima, posebno djeci i mladima. Sredstva koja su kroz javni poziv dodijeljena od strane Federalno ministarstvo kulture i sporta za projekte sportske infrastrukture predstavljaju značajnu podršku unapređenju uslova za razvoj sporta na području Tuzlanski kanton. Posebno je važno naglasiti da se radi o projektima koji se odnose na izgradnju, rekonstrukciju i modernizaciju sportske infrastrukture, što podrazumijeva finansijski zahtjevnije investicije koje dugoročno doprinose razvoju sporta i poboljšanju uslova za trening i takmičenja sportista.

Iako se može konstatovati da su sredstva dodijeljena Tuzlanskom kantonu relativno značajna, imajući u vidu da je kroz ovaj program podržano više projekata u različitim lokalnim zajednicama, istovremeno se može zaključiti da su potrebe u oblasti sportske infrastrukture znatno veće. Tuzlanski kanton, kao jedan od većih kantona u Federaciji Bosne i Hercegovine sa velikim brojem sportskih klubova, sportista i sportskih objekata koji zahtijevaju kontinuirano ulaganje, ima izraženu potrebu za dodatnim investicijama u ovu oblast. Stoga se može ocijeniti da su sredstva koja su dodijeljena kroz ovaj program značajna i opravdana, s obzirom na prirodu infrastrukturnih projekata koji zahtijevaju veća ulaganja, ali da su potrebe za ulaganjima u sportsku infrastrukturu i dalje znatno veće, te da bi veći obim sredstava u budućim programima dodatno doprinio unapređenju uslova za razvoj sporta na području Tuzlanskog kantona.<sup>12</sup>

#### *10.4 Finansijska podrška iz Budžeta TK*

U okviru ukupne podrške razvoju sporta u 2025. godini, važno je istaći da finansiranje sportskih aktivnosti na području Tuzlanskog kantona nije isključivo vezano za Ministarstvo za kulturu, sport i mlade TK, već da u tom procesu aktivno učestvuju i druga resorna ministarstva Vlade Tuzlanskog kantona.

Tako je **Ministarstvo za boračka pitanja Tuzlanskog kantona** u 2025. godini izdvojilo **70.000,00 KM** za sufinansiranje troškova učešća, organizovanja i održavanja sportskih takmičenja i manifestacija u oblasti invalidskog sporta. Sredstva su doznačena za tri saveza koji djeluju na području kantona, i to **Savez sjedeće odbojke RVI i IL Tuzlanskog kantona**, **Savez košarkaških invalidskih klubova Tuzlanskog kantona** i **Sportski savez osoba sa invaliditetom Tuzlanskog kantona**.

Ova finansijska podrška predstavlja značajan doprinos razvoju i održivosti invalidskog sporta, te jasno ukazuje na opredijeljenost Vlade Tuzlanskog kantona da kroz više resora sistemski podržava sport i sportske aktivnosti. Istovremeno, navedeno potvrđuje da se sredstva za sport na području kantona ne dodjeljuju isključivo putem Ministarstva za kulturu, sport i mlade TK, već da u finansiranju sporta, u skladu sa svojim nadležnostima, učestvuju i druga ministarstva, čime se osigurava širi i sveobuhvatniji institucionalni pristup razvoju sporta.

Vlada Tuzlanskog kantona je i tokom 2025. godine putem sredstava iz tekuće rezerve, na prijedlog Ministarstva, pružila podršku sportistima i sportskim kolektivima koji ostvaruju značajne rezultate i predstavljaju Tuzlanski kanton i Bosnu i Hercegovinu na međunarodnoj i državnoj sceni. Tako su izdvojena sredstva u iznosu od **12.000,00 KM** za odlazak karate reprezentativca sa područja Tuzlanskog kantona na Evropsko prvenstvo. Ova podrška je od velikog značaja jer karate sport ima dugu tradiciju na području Tuzlanskog

<sup>12</sup> Federalno Ministarstvo kulture i sporta

kantona, a sportisti iz ovog kantona kontinuirano ostvaruju zapažene rezultate na međunarodnim takmičenjima i predstavljaju Bosnu i Hercegovinu u sastavu reprezentacije. Karate klubovi sa područja Tuzlanskog kantona redovno učestvuju na državnim i međunarodnim turnirima, te ostvaruju medalje i vrhunske plasmane, čime doprinose afirmaciji ovog sporta i promociji kantona. Takođe, Udruženje građana „Flek Tom Cat“ ostvarilo je pravo na 15.000,00 KM za učešće na državnom prvenstvu, čime je omogućeno pokrivanje dijela troškova organizacije, priprema i nastupa takmičara na ovom značajnom takmičenju. Učešće na državnim prvenstvima ima veliki značaj za afirmaciju sportskih kolektiva, ali i za stvaranje mogućnosti da sportisti izbore nastup na međunarodnim takmičenjima i reprezentativnim selekcijama. Podršku je dobio i Sportski klub invalida sjedeće odbojke „Sinovi Bosne“ iz Lukavca, kojem je odobreno 10.000,00 KM za učešće na takmičenju Champions Cup. Ovaj klub je jedan od najuspješnijih sportskih kolektiva osoba sa invaliditetom u Bosni i Hercegovini i regionu, sa dugogodišnjom tradicijom vrhunskih rezultata. „Sinovi Bosne“ su kroz historiju nastupa na evropskim takmičenjima ostvarili značajne uspjehe, uključujući i nastupe u evropskim ligama i osvajanje prestižnih međunarodnih turnira, čime su postali jedan od simbola uspješnog sporta osoba sa invaliditetom u Bosni i Hercegovini. Pored toga, podršku je dobio i Košarkaški savez Bosne i Hercegovine, kojem je dodijeljeno 50.000,00 KM za sufinansiranje troškova učešća omladinskih reprezentativnih selekcija Bosne i Hercegovine na evropskim prvenstvima. Sredstva su namijenjena za selekcije U16 i U18 u muškoj i ženskoj konkurenciji, koje redovno učestvuju na evropskim prvenstvima pod okriljem FIBA-e. Ovakva podrška je značajna jer omladinske reprezentativne selekcije predstavljaju temelj razvoja vrhunske košarke, a nastupi na evropskim prvenstvima omogućavaju mladim sportistima sticanje međunarodnog iskustva i dalji razvoj sportskih karijera.

## **11 SMJERNICE RAZVOJA SPORTA NA PODRUČJU TUZLANSKOG KANTONA U 2026. GODINI**

Jedan od ključnih dijelova Informacije o stanju u oblasti sporta na području Tuzlanskog kantona predstavljaju smjernice za razvoj sporta u 2026. godini kreirane na osnovu prezentiranih informacija u dokumentu. Realizacijom navedenih smjernica doprinijelo bi se unapređenju stanja u oblasti sporta na području Tuzlanskog kantona.

Smjernice za aktivnosti koje je potrebno realizirati u 2026. godini kako bi se doprinijelo unapređenju stanja sporta na području Tuzlanskog kantona u vezi su sa godišnjim i trogodišnjim programom rada Ministarstva koji proizilazi iz usvojenih strateških dokumenata i akcionih planova, te su za razliku od dosadašnje prakse u nastavku predstavljeni strateški pravci djelovanja u oblasti sporta na području Kantona kroz konkretne aktivnosti i sa finansijskim efektima svakog projekta.


U 2026. godini planiran je nastavak unapređenja sistema podrške sportu kroz širi obuhvat korisnika i povećanje sredstava namijenjenih ključnim segmentima razvoja sporta. U tom smislu, planirano je povećanje sredstava za stipendiranje sportista i trenera, kao i za školske sportske stipendije, čime se nastoji dodatno ojačati sistem podrške sportskim talentima i afirmisanim sportistima. Također, planirano je povećanje sredstava namijenjenih Javnom pozivu za sufinansiranje programa i projekata sportskih organizacija, s ciljem obuhvata većeg broja sportskih kolektiva i jačanja njihovih programskih aktivnosti. S druge strane, sredstva namijenjena za sportsku infrastrukturu u 2026. godini ostaju na nivou planiranom u prethodnom periodu. U 2026. godini planirano je i povećanje sredstava za sufinansiranje rada Sportskog saveza Tuzlanskog kantona i Školskog sportskog saveza Tuzlanskog kantona. Jačanje institucionalne podrške ovim organizacijama od posebnog je značaja za unapređenje

organizacije sportskih aktivnosti i takmičenja na području Kantona, a naročito za razvoj školskog sporta. Školski sport predstavlja jednu od najvažnijih karika u ukupnom sportskom sistemu jer omogućava masovno uključivanje djece i mladih u organizovane sportske aktivnosti kroz obrazovni sistem. Upravo zbog toga kontinuitet i kvalitet organizacije školskih sportskih takmičenja predstavlja važan segment razvoja sporta na području Tuzlanskog kantona.

Pored navedenog, u 2026. godini planirano je i sufinansiranje vrhunskog sporta međunarodnog nivoa, odnosno programa i projekata učešća sportskih klubova u kolektivnim sportovima na zvaničnim evropskim klupskim takmičenjima, čime se nastoji pružiti podrška klubovima koji predstavljaju Tuzlanski kanton i Bosnu i Hercegovinu na međunarodnoj sportskoj sceni. Također, planirana je podrška Nogometnom savezu Tuzlanskog kantona za sufinansiranje kotizacija za takmičenje nogometnim klubovima koji se takmiče u prvoj i drugoj kantonalnoj ligi u nogometu, kao i za sufinansiranje troškova službenih lica posredstvom Nogometnog saveza Tuzlanskog kantona.

Realizacijom planiranih aktivnosti u 2026. godini očekuje se daljnje unapređenje sportskog sistema na području Tuzlanskog kantona, povećanje masovnosti i kvaliteta sportskih aktivnosti, kao i osnaživanje školskog sporta kao temelja razvoja mladih sportskih talenata. Ove smjernice predstavljaju strateški okvir djelovanja Ministarstva, s ciljem da se osiguraju optimalni rezultati kroz efikasnu podršku sportskim organizacijama, talentovanim sportistima i projektima od regionalnog i međunarodnog značaja.

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**Ministarstvo za kulturu, sport i mlade**  
**Broj: 11/1-36-000771-14/26**  
**Tuzla, 11.03.2026.godine**



2.1 Podržati projekte rekonstrukcije i opremanja postojećih sportskih objekata	II-IV kvartal (kontinuirano)	100% projekata koji ispunjavaju uslove i kriterije podržano	Odjeljenje za kulturu, sport i mlade Odsjek za sport	K	DA	Budžetska sredstva	729.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	729.000
2.2 Podržati realizaciju projekta Male olimpijske igre TK kao kantonalnih školskih takmičenja u organizaciji Školskog sportskog saveza TK	II-IV kvartal (kontinuirano)	Školski sportski savez TK organizuje kantonalna školska takmičenja i realizuje projekat Male olimpijske igre 20% povećan broj djece koji učestvuju na Malim olimpijskim igrama	Odjeljenje za kulturu, sport i mlade Odsjek za sport	-	NE	Budžetska sredstva	20.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	20.000
2.3. Podrška radu Savjeta za sport Tuzlanskog kantona	I-IV kvartal (kontinuirano)	Održane sjednice Savjeta za sport podržane administrativno i finansijski	Odjeljenje za kulturu, sport i mlade Odsjek za sport		NE	Budžetska sredstva	5.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	5.000
Ukupno za program (mjeru) 2.						Budžetska sredstva	754.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	754.000
<b>Redni broj i naziv programa (mjere): 3. Unapređenje sistema rada sportskih organizacija na području Tuzlanskog kantona</b>							
<b>Naziv strateškog dokumenta, oznaka strateškog cilja, prioriteta i mjere koja je preuzeta kao program: Strategija razvoja Tuzlanskog kantona za period 2021.-2027. Godine, Mjera 2.4.2</b>							
<b>Naziv aktivnosti/projekta</b>	<b>Rok izvršenja</b>	<b>Očekivani rezultat aktivnosti/projekta</b>	<b>Nosilac (najmanji organizacioni dio)</b>	<b>P.JI<sup>2</sup></b>	<b>Usvaja se<sup>3</sup></b>	<b>Izvor i iznos planiranih finansijskih sredstava u KM</b>	

					(Da/Ne)	Izvor	Iznos
3.1. Ažurirati registar pravnih lica u oblasti sporta na području Tuzlanskog kantona	IV kvartal (kontinuirano)	Redovno ažuriranje Registra pravnih lica	Odjeljenje za kulturu, sport i mlade Odsjek za sport	-	DA	Budžetska sredstva	-
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	-
3.2. Ažurirati registar fizičkih lica u oblasti sporta na području Tuzlanskog kantona	IV kvartal (kontinuirano)	Redovno ažuriranje Registra fizičkih lica	Odjeljenje za kulturu, sport i mlade Odsjek za sport	-	DA	Budžetska sredstva	-
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	-
3.3. Podrška radu Sportskog saveza Tuzlanskog kantona	I-IV kvartal (kontinuirano)	100% projekata i rad kancelarije Sportskog saveza koji ispunjavaju uslove za dodjelu sredstava podržani	Odjeljenje za kulturu, sport i mlade Odsjek za sport	-	NE	Budžetska sredstva	100.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	100.000
3.4. Podrška radu Sportskog saveza lica sa invaliditetom Tuzlanskog kantona	I-IV kvartal (kontinuirano)	100% projekata i rad kancelarije Sportskog saveza lica sa invaliditetom koji ispunjavaju uslove za dodjelu sredstava podržani	Odjeljenje za kulturu, sport i mlade Odsjek za sport	-	NE	Budžetska sredstva	30.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	30.000
3.5. Izvršiti kontrolu i efekte dodijeljenih sredstava za projekte sportskih organizacija	I-II kvartal (kontinuirano)	100% pregledanih Izveštaja o utrošku dodijeljenih sredstava za	Odjeljenje za kulturu, sport i mlade	-		Budžetska sredstva	-

		projekte sportskih organizacija kojima su dodijeljena sredstva u prethodnoj godini	Odsjek za sport		DA	Kreditna sredstva	-
					DA	Sredstva EU	-
					DA	Ostale donacije	-
					DA	Ostala sredstva	-
					DA	Ukupno	-
3.6. Utvrditi uslove, kriterije i postupak raspodjele budžetskih sredstava sa potrošačke jedinice 32010002-Tjelesna kultura i sport za svaku budžetsku godinu	I kvartal	Uslovi, kriteriji i postupak raspodjele budžetskih sredstava sa potrošačke jedinice 32010002-Tjelesna kultura i sport utvrđeni za budžetsku 2026. godinu	Odjeljenje za kulturu, sport i mlade Odsjek za sport	-	DA	Budžetska sredstva	-
					DA	Kreditna sredstva	-
					DA	Sredstva EU	-
					DA	Ostale donacije	-
					DA	Ostala sredstva	-
					DA	Ukupno	-
3.7. Podržati projekte/programe sportskih organizacija u oblasti tjelesne kulture i sporta	III kvartal - kontinuirano	100% projekata koji ispunjavaju uslove i kriterije podržano	Odjeljenje za kulturu, sport i mlade Odsjek za sport	-	DA	Budžetska sredstva	1.981.000
					DA	Kreditna sredstva	-
					DA	Sredstva EU	-
					DA	Ostale donacije	-
					DA	Ostala sredstva	-
					DA	Ukupno	1.981.000
3.8. Podržati sportiste kroz stipendiranje	II kvartal	100% sportista koji ispunjavaju uslove i kriterije podržano	Odjeljenje za kulturu, sport i mlade Odsjek za sport	-	DA	Budžetska sredstva	300.000
					DA	Kreditna sredstva	-
					DA	Sredstva EU	-
					DA	Ostale donacije	-
					DA	Ostala sredstva	-
					DA	Ukupno	300.000
3.9. Podržati organizaciju reprezentativnih sportskih utakmica i takmičenja	kontinuirano	100% nadležnih Saveza koji ispunjavaju uslove a koji su podnijeli zahtjev	Odjeljenje za kulturu, sport i mlade Odsjek za sport	-	DA	Budžetska sredstva	60.000
					DA	Kreditna sredstva	-
					DA	Sredstva EU	-
					DA	Ostale donacije	-

						Ostala sredstva	-
						<b>Ukupno</b>	<b>60.000</b>
3.10. Podržati klubove prve i druge kantonalne lige u nogometu posredstvom Nogometnog saveza TK	I-III kvartal kontinuirano	100% klubova 1. i 2. kantonalne lige u nogometu podržano	Odjeljenje za kulturu, sport i mlade Odsjek za sport	-	DA	Budžetska sredstva	180.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						<b>Ukupno</b>	<b>180.000</b>
3.11. Podržati sportske klubove koji nastupaju na zvaničnim evropskim klupskim takmičenjima	I-IV kvartal kontinuirano	100% klubova klubove koji nastupaju na zvaničnim evropskim klupskim takmičenjima podržano	Odjeljenje za kulturu, sport i mlade Odsjek za sport	-	DA	Budžetska sredstva	250.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						<b>Ukupno</b>	<b>250.000</b>
3.12. Izraditi Strategiju razvoja sporta Tuzlanskog kantona za period 2026-2034. godine	IV kvartal - kontinuirano	Pokrenut proces izrade Strategije razvoja sporta Tuzlanskog kantona za period 2025-2034	Odjeljenje za kulturu, sport i mlade Odsjek za sport	-	DA	Budžetska sredstva	20.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						<b>Ukupno</b>	<b>20.000</b>
3.13. Promovisati sport i sportske aktivnosti na području Tuzlanskog kantona kroz medijsku promociju i štampanje publikacije o realizovanim sportskim aktivnostima i podršci sportu na području Tuzlanskog kantona	IV kvartal	Potpisan i realizovan 1 ugovor o medijskoj promociji sporta na području Tuzlanskog kantona Izvršena 1 nabavka usluge štampanja publikacije o realizovanim sportskim aktivnostima i podršci sportu na području Tuzlanskog kantona	Odjeljenje za kulturu, sport i mlade Odsjek za sport	-	NE	Budžetska sredstva	15.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						<b>Ukupno</b>	<b>15.000</b>
3.14. Urediti normativno-pravni okvir u oblasti sporta	II kvartal	Provedbeni propis kojim se utvrđuju kantonalne nagrade,	Odjeljenje za kulturu, sport i mlade	-	DA	Budžetska sredstva	-

		priznanja i stipendije za sport donesen u 2026.godini	Odsjek za sport			Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	-
3.15. Dodjeliti priznanja zaslužnim sportistima, sportskim radnicima i sportskim organizacijama sa područja Tuzlanskog kantona za postignute sportske rezultate u vidu povelje, plakete, diplome i slično	kontinuirano	U skladu sa provedbenim propisom, dodjeljivati priznanja	Odjeljenje za kulturu, sport i mlade Odsjek za sport	-	NE	Budžetska sredstva	10.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	10.000
Ukupno za program (mjeru) 3.						Budžetska sredstva	2.946.000
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	2.946.000,00
Redni broj i naziv programa (mjere): 4. Unapređenje uslova za kulturno-historijski razvoj							
Naziv strateškog dokumenta, oznaka strateškog cilja, prioriteta i mjere koja je preuzeta kao program: Strategija razvoja Tuzlanskog kantona za period 2021.-2027. godine, Mjera 2.4.3.							
Naziv aktivnosti/projekta	Rok izvršenja	Očekivani rezultat aktivnosti/projekta	Nosilac (najmanji organizacioni dio)	PJI <sup>2</sup>	Usvaja se <sup>3</sup> (Da/Ne)	Izvori i iznosi planiranih finansijskih sredstava u KM	
						Izvor	Iznos
4.1. Izgraditi zgradu Arhiva Tuzlanskog kantona	IV kvartal (kontinuirano)	Projektna dokumentacija za izgradnju zgrade Arhiva Tuzlanskog kantona izrađena	Odjeljenje za kulturu, sport i mlade Odsjek za kulturu i mlade	-	DA	Budžetska sredstva	-
						Kreditna sredstva	-
						Sredstva EU	-
						Ostale donacije	-
						Ostala sredstva	-
						Ukupno	-